

李文忠公奏稿

李文忠公奏稿

卷之十九目錄

籌運伊犁烏城兵糧摺

同治十一年正月十九日

軍功補缺壅滯摺

同治十一年正月十九日

籌修永定河閘壩摺

同治十一年正月十九日

幼童出洋肄業事宜摺

同治十一年正月十九日
附請單

旗租解部請飭妥議摺

同治十一年正月二十四日

請續撥張家口糧臺部餉摺

同治十一年二月初二日

巴里坤兵食改辦粟米摺

同治十一年二月十九日

傳辦緞綢懇請改派並籌協濟摺

同治十一年二月十九日

驛站因糧變通造報摺

同治十一年三月初一日

籌辦工賑並赴津日期片

同治十一年三月初一日

口外兵餉應就近支放捐

同治十一年三月十四日

日本使員到津片

同治十一年四月初三日

奉辦緞綢請酌減捐

同治十一年四月初四日

修濬洛河工程捐

同治十一年四月初八日

庫防練餉請加撥捐

同治十一年四月十七日

永屬鹽務情形捐

同治十一年四月十七日

防營修築南運河隄並捐賑捐

同治十一年五月初八日

永定河開壩工竣捐

同治十一年五月初八日

撥解緞綢價銀捐

同治十一年五月初十日

籌議製造輪船未可裁撤捐

同治十一年五月十五日

魁津機局調員片

同治十一年五月十五日

張家口捐修石壩捐

同治十一年五月二十二日

蘇省軍需卹賞請核銷摺

同治十一年五月二十二日

辨駁日使收約摺

同治十一年五月二十八日
附清單二件

張家口糧臺報銷摺

同治十一年六月初八日

修治府河工程摺

同治十一年六月二十日
附清單

籌解新賑餉銀摺

同治十一年六月二十七日

興工代賑摺

同治十一年六月二十七日

外省捐賑請獎片

同治十一年六月二十七日

密籌調員接統銘軍摺

同治十一年八月初二日

請 陛見摺

同治十一年八月二十日

李文忠公奏稿卷十九

全集一之十九

桐城吳汝綸編錄

籌運伊犁烏城兵糧摺

同治十一年正月十九日

奏爲籌運伊犁烏城調防官兵口糧恭摺仰祈

聖鑒事竊據口北道奎斌稟稱接准察哈爾都統照會同治十年十一月二十五日奉

上諭杜嘎爾奏調赴伊犁官兵起程日期各摺片內蘇肯所帶吉林官兵五百名經杜嘎爾飭令十二月初六日起分隊起程吉爾洪額所帶黑龍江官兵五百名亦令預籌駝隻前進等因欽此遵查現調之吉林黑龍江官兵應需口糧前由口北糧臺按月運交總統杜嘎爾行營轉發已運至同治十一年正月月底止今調赴伊犁等處防剿口糧由何處支給未奉明文查將軍榮全由烏城帶

赴伊犁官兵裹糧係由歸綏口北分辦運至烏里雅蘇臺將軍衙門轉送現調吉黑官兵口糧自應仍由糧臺辦運但道路寫遠未便按月轉運且未接到該軍實在數目亦難按名核算應即寬爲籌辦查該軍每起五百名加管帶員弁以五百二十人約計每名日支米八合三勺每月共需米一百二十九石四斗八升稍爲寬備每月每起辦運粟米一百三十石按三箇月運送一次解至烏里雅蘇臺將軍衙門交收即由該處查明該官兵駐紮處所交臺站分別運送又查駐紮烏城之吉黑官兵五百名口糧已運至同治十一年二月底止該起官兵現歸烏里雅蘇臺將軍管轄亦請每月解米一百三十石解由該將軍衙門查收放給以歸畫一等情前來除批飭照辦暨分咨查照外理合恭摺具

奏伏乞

皇太后

皇上聖鑒謹

奏

軍功補缺壅滯摺

同治十一年正月十九日

奏爲軍功候補人員補缺壅滯懇

恩量予變通以示平允恭摺仰祈

聖鑒事竊查同治七年吏部議覆御史李德源條奏嗣後各省知縣參革之缺准其扣留以軍功人員請補其丁憂遺缺統歸部選等因惟是各省丁缺多於參缺況參革一項因公處分及

計典等案仍歸部選僅止專案參革簡缺始准軍功人員請補此項遺缺無多軍功候補一班幾無序補之期查保歸軍功候補人員或曾經帶隊疊著戰功或久在行間當差奮勉才具既備歷艱苦升階亦非由倖邀軍興二十年來由軍功擢至監司封疆者不可勝數豈州縣以下遂無人才是以定例丁憂參劾部選之缺專歸軍功候補人員序補原所以示優異而勵勤勞也迨奉新章將

丁憂之缺改爲部選其軍功候補初任人員又不准請補煩要之
缺遂致此班壅滯愈甚使人視軍功爲無用必將以軍營爲畏途
設有緩急何以驅邁志士因思部選之員精明諳練堪膺民社者
固不乏人而剛茸生疏才難勝任者亦復不少且候選人員未選
之前尙可別圖生計候補人員一經到省卽不能一日擅離其從
軍時積歲暴露風霜到省後窮年奔走學習補缺無望未免向隅
臣留心察看軍功班內實有身經險阻洞悉民情者其才儘堪造
就奈限於新章未能及時自效殊爲可惜似應設法變通以廣登
進以勸將來據升任藩司錢鼎銘具詳請奏前來合無仰懇
天恩俯准飭部將丁憂參革兩項中簡選缺悉改爲一選一留庶
內外選補人員兩無偏枯非惟軍功一途不致棄置而酌量揀補
兼可收得人之效於地方吏治均有裨益是否有當理合恭摺具

陳伏乞

皇太后

皇上聖訓示謹

奏

籌修永定河閘壩摺

同治十一年正月十九日

奏爲籌款估修永定河上游金門閘減水石壩以工代賑恭摺仰祈

聖鑒事竊臣上年十月間由天津回省順道查勘永定河工程會將大略情形附片奏陳在案伏查永定河連年漫口固由盛漲時下口不能暢流亦由河身淤墊過高上游無所分洩臣此次督飭該河道及委員等逐段履勘講求疏濬之法查有南二工金門閘減水石壩一座建自乾隆三年南北各築壩臺中段用石料修築龍骨底鋪海墁石板外接出水石簍箕下又有出水灰簍箕其壩臺外護以魚鱗埽段工程極爲堅固每遇大汛盛漲賴以分減水勢實爲法良意美嗣因河底積漸淤高乾隆三十五年道光三十一年二十三年逐將龍骨加高至八尺七寸尙可洩水數寸迄

今又將三十年河底愈淤愈高已與龍骨相平若驟放水恐成決口是以同治五年以後築埧堵閉雖連遭漫口之患涓滴不敢宣洩石壩亦遂廢而不治因思欲去河患必須先將上游減水石壩認真修築並將引河逐段挑挖俾水勢稍有分銷庶可漸施補救且本年濱河各屬被災地畝多未涸復二麥補種不及民情困苦正須預籌接濟若乘此時集夫興修俾窮民傭工趁食藉可以工代賑實爲一舉兩得臣飭據永定河道李朝儀候補知府周馥等詳加查勘較量現在河身若僅就原有龍骨之上再行增高必致水入倒灌跌成坑塘於海墘金牆皆有所礙議將龍骨中段二十丈升高四尺兩旁十八丈各升高五尺所有舊龍骨之高八尺七寸者全行拆卸其重建之新龍骨放長進身六丈下接舊海墘上作坦坡之形使水勢平緩過閘方無跌坑掣溜之虞其舊有海墘

與南北舊金牆均分別填補拘抵北壩臺東面應移建九丈與龍
骨緊接壩臺內外應遵舊式鑲做埽段仍於龍骨上添築攔水土
埝一道辦法庶較堅穩該處引河係由童村入小清河查勘河形
尙有溝槽可就計工長四千一百七十丈均應一律挑挖通深連
建

御碑亭汛房器具善後各工程核實摺節共估需實銀六萬四千
七百四十二兩七錢九分二釐稟經臣札飭升任藩司錢鼎銘在
同治十年秋災賑撫項下如數通融籌撥發交該道領回購備應
用灰石料物督飭印委廳汛員弁夫役及時興辦勿任稍有草率
偷減仍俟事竣彙案造銷再此項工程舊章每興修一次估需銀
十數萬兩不等茲飭挪用賑撫銀六萬餘兩籌辦要工卽以工代
賑所需工料經臣再四籌商剋減係就現時價值核實估計委無

絲毫浮冒與常年請款撥修者不同所有應扣六分部平等銀若照向例核扣必不敷用應請免其照扣以期工歸實濟所有籌撥賑款興修永定河上游金門閘減水石壩要工緣由理合恭摺具陳伏乞

皇太后

皇上聖鑒訓示施行謹

奏

幼童出洋肄業事宜摺

同治十一年正月十九日

奏爲遴派委員攜帶幼童出洋肄業兼陳應辦事宜恭摺仰祈
聖鑒事竊臣等擬選聰穎子弟前赴泰西各國肄習技藝以培人
才業於十年七月初三日專摺會奏在案旋准總理衙門覆奏不
分滿漢子弟擇其質地端謹文理優長一律送往每年所需薪水
膏火准於江海關洋稅項下指撥等因知照前來伏查挑選幼童
出洋肄業固屬中華創始之舉抑亦古來未有之事所有攜帶幼
童委員聯絡中外事體重大擬之古人出使絕域雖時地不同而
以數萬里之遙需之二十年之久非堅忍耐勞志趣卓越者不足
以應是選查有奏調來江之四品銜刑部候補主事陳蘭彬夙抱
偉志以用世自命挹其容貌則粥粥若無能絕不矜才使氣與之
討論時事皆能洞燭幾微蓋有遠略而具內心者又運同銜江蘇

候補同知咨閣前在花旗居處最久而志趣深遠不爲習俗所囿
同治二年曾派令出洋購買機器該員練習外洋風土人情美國
尤熟遊之地足以聯外交而窺祕鑰以上二員上次摺內業經奏
明均堪勝任相應請

旨飭派陳蘭彬爲正委員咨閣爲副委員常川駐紮美國經理一
切事宜此時不敢遽請獎敘將來辦有成效再由臣等從優酌保
至挑選幼童應在上海先行設局頭批出洋後卽挑選次年之第
二批又挑選第三第四年各批與出洋之員呼吸相通查有鹽運
使銜分發候補知府劉翰清淵雅純篤熟悉洋務業經檄令總理
滬局事宜所有駐洋及在滬兩局中外大小事件由陳蘭彬等互
相商辦各專責成茲將臣等前奏所未及者酌擬應辦事宜開列
清單恭呈

御覽仰懇

飭下總理衙門核覆施行所有遴派委員攜帶幼童出洋肄業兼
陳應辦事宜緣由理合恭摺會陳伏乞

皇太后

皇上聖鑒訓示謹

奏

謹將挑選幼童及駐洋應辦事宜分條開列恭呈

御覽

一挑選幼童不分滿漢子弟俱以年十二歲至二十歲爲率收錄入局由滬局委員查考中學西學分別教導將來出洋後肄習西學仍兼講中學課以孝經小學五經及

國朝律例等書隨資高下循序漸進每遇房虛昂星等日正副二委員傳集各童宣講

聖諭廣訓示以尊君親上之義庶不至囿於異學

一幼童選定後取具年貌籍貫暨親屬甘結收局注冊在滬局肄習以六箇月爲率察看可以造就方准資送出洋仍由滬局造冊報明通商大臣轉咨總理衙門查考至洋局課程以四箇月考驗一次年終分別等第報查其成功則以十五年爲率中間藝成後

游歷兩年以驗所學然後回至內地聽候總理衙門酌量器使奏明委用此係選定官生不准半途而廢亦不准入籍外洋學成後不准在華洋自謀別業

一出洋委員及駐滬辦事所有內外往來文件應刊給關防洋局之文曰奏派選帶幼童出洋肄業事宜關防滬局之文曰總理幼童出洋肄業滬局事宜關防均經臣刊刻飭發以資信守

一每年八月頒發時憲書由江海關道轉交稅務司遞至洋局恭逢三大節以及朔望等日由駐洋之員率同在事各員以及諸幼童望闕行禮俾嫻儀節而昭誠敬

一出洋辦事除正副二委員外擬用繙譯一員教習一員查有五品銜監生曾恆忠究心算學兼曉沿海各省土音堪充繙譯事宜

光祿寺典簿附監生葉源濬文筆暢達留心時務堪充出洋教習
事宜業由臣檄飭遵照屆時隨同正副委員一併前往

一每年需用經費查照奏定章程於江海關洋稅項下指撥洋局
用款下年應用之項於上年六月前由上海道籌撥銀兩限同稅
務司匯寄外洋交駐洋之員驗收其滬局用款卽交滬局總辦支
銷惟原奏係二十年内共用一百二十萬金約計每年須六萬兩
而細加推算分年應用之款參差不齊不能適符六萬之數如首
數年滬上設局幼童齊往用款較鉅第四年竟至八萬九千六百
餘兩末數年幼童已歸用款較減第十九年僅需二萬三千四百
餘兩此外各年遞推亦皆多寡懸殊茲由陳蘭彬等核開清單某
年應用銀若干交江海關道署存照按年寄洋仍由該道分析造
報以昭核實

旗租解部請飭妥議摺

同治十一年正月二十四日

奏爲直屬旗租奉飭解部所有司庫應行動撥旗租各要款無項可指請

旨飭部妥議辦理恭摺仰祈

聖鑒事竊准戶部咨奏令將直屬旗租自同治十一年起仍解部庫以備賞項而復舊制奉

旨依議欽此行飭遵照等因當經行司妥議詳辦茲據升任藩司錢鼎銘詳稱直屬各州縣經徵八項旗租每歲僅應徵銀二十八萬餘兩內除留充駐防兵餉及應徑解戶部等衙門租銀並災歉緩徵暨民欠外約計每歲僅實收銀十七萬至十九萬數千兩不等歷年奉部指撥密雲等十四駐防兵役米折銀一萬八千二百餘兩永定南北運河歲搶修加增運腳備防稽料約共需

銀七萬兩新疆月餉銀三萬兩東三省俸餉銀五萬兩又每年找發

東陵

西陵欠項銀二萬五千兩計共需銀十九萬三千二百餘兩皆應由旗租內撥放不吝短缺此外尚有奉文在節年旗租項下動撥之墊辦京局煤炭等款亦須次第找發通年核計實係入不敷支茲奉文自同治十一年爲始批解部庫惟查直省本係缺額之區連歲水旱災歉蠲緩已多地糧正款無可挹注若旗租一經解部而應動旗租之款仍飭司籌解斷無款可撥貽誤堪虞惟有據實陳請將應動旗租之款亦自同治十一年爲始概由戶部籌撥以便遵照將各屬旗租專款存儲俟每年奏銷後按照所徵之數彙總解部抑或仍將旗租截留司庫庶可無誤要需等情前來臣

查直屬旗租一項從前軍務緊急他款暫置不發專以留備軍需
迨後軍務肅清各項奉部指撥遂又分濟多處如密雲等十四駐
防旗兵米折永定南北運河歲搶修經費東三省新疆緊餉及
東西陵厯年欠項皆係代部發放之款並非留抵直省別用也循
繹戶部原奏似只照例催解尚未籌及旗租應放各款從何指撥
且已於上年十二月奏請加撥永定河歲搶修銀案內聲明大概
嗣准部議奏稱旗租指撥多款未便顧此失彼固亦深悉此項不
能遽充

恩賞之用與其批解部庫而各款仍須由部撥放不若暫留司庫
而各款可以就近勻支斯於帑項並無出入而要需亦不致遲誤
相應籲懇

天恩敕部再行妥議准將直屬旗租暫留司庫備撥各駐防餉米

各河道歲搶修及各省緊餉等要款俟數年後體察情形再議復
舊若必令按年解部應請將直屬應行動撥旗租各款自同治十
一年爲始亦全數由部撥放再飭司彙總報解庶免臨時諉誤除
嚴飭藩司將歷年動用旗租分款造冊詳送查銷外理合恭摺據
實具陳伏乞

皇太后

皇上聖鑒訓示謹

奏

請續撥張家口糧臺部餉捐

同治十一年二月初二日

奏爲續懇

飭撥張家口糧臺部餉恭摺仰祈

聖鑒事竊查前因回匪竄擾烏城等處調撥察哈爾吉林黑龍江各起馬隊出口防剿並調宣化古北口練軍協防庫倫遵

旨任張家口設立糧臺飭委口北道奎斌經理辦運各軍口糧兩次請撥部餉銀六萬兩察哈爾吉林黑龍江官兵應需米價口袋等項卽在部餉項下開銷宣化古北口練軍米價由直隸練餉局籌撥其口袋等銀亦在部餉內動用疊經臣奏蒙

恩准在案計自同治九年十二月開辦之日起截至十一年正月底止共運過察哈爾吉林黑龍江各營兵米一萬餘石又運署將軍榮全帶赴伊犁官兵裹糧米十萬斤又運吉林黑兩軍加增白麵

九萬三千二百餘斤以上各營並宣化古北口練軍裝米所用牛毛袋布袋油布袋三萬七千四百餘條又荆筐麻繩及裝運夫工腳價一切雜支等項共在前領部餉內支過銀五萬七千四百餘兩現僅存銀二千五百餘兩日下臺站積米漸次疏通各營口糧必須陸續運發以資接濟所存銀兩不敷支用據該道奎斌稟請奏撥前來相應請

旨飭下戶部迅速照案撥銀三萬兩仍由順天府尹派員領解赴張家口糧臺交收以濟要需而裕兵食所有續撥部餉緣由理合恭摺具陳伏乞

皇太后

皇上聖鑒訓示謹

奏

巴里坤兵食改辦粟米摺

同治十一年二月十九日

奏爲籌運巴里坤軍營麵斤並請嗣後改辦粟米以裕兵食恭摺仰祈

聖鑒事竊臣欽奉同治十年十二月二十二日

上諭景廉奏馳抵巴里坤籌辦軍糧各摺塞外用兵籌糧難於籌餉現在巴里坤一帶糧石無多將來大軍銜接西進更難倉卒立辦著飭口北歸綏兩道廣爲采辦麵斤隨時運送等因欽此遵卽恭錄飭據口北道奎斌先後稟稱采辦白麵十萬斤分作四批每批解麵二百袋每袋裝麵一百二十五斤用雙綫袋牛毛袋兩層套裝於本年二月初五至十六等日全數運送出口赴烏里雅蘇臺將軍衙門接收轉運白麵每斤價銀二分五釐共銀二千五百兩雙綫袋牛毛袋各八百條每條價銀三錢八分共銀六百八兩

網運夫價銀四百三十二兩以上統共用過銀三千五百四十兩已飭直隸練餉局照數撥給就款開除免再造冊報銷至張家口距巴里坤等處計程萬里白麪底質潮溼遠道馳送不能曬晾此時天氣尙寒暫可辦運以後和暖沿途熱蒸必致返潮發變不堪作食該處如雷續運擬請查照各營之式改辦粟米稟請核

奏等情前來查巴里坤距直過遠烏魯木齊更在巴里坤之西遠道運糧恐費力而不濟用景廉初至彼處自須後路設法采運若駐紮已定或能就地屯墾招買以資接濟即可省沿途周折糜費若仍必需張家口糧運應酌購粟米以免霉變惟該處兵隊若干約需米糧若干口北歸綏兩處各應辦運若干均應豫爲籌定擬請

旨飭下烏魯木齊都統景廉體察情形查明確數隨時分別知照

以便轉飭核辦嗣後所需米價腳費卽由口北道在糧臺領到部
餉項下核實動支彙案造報以歸畫一所有籌運巴里坤軍糧緣
由理合恭摺具

奏伏乞

皇太后

皇上聖鑒訓示施行謹

奏

傳辦緞綢懇請改派並籌協濟摺

同治十一年二月十九日

奏為奉文傳辦

費用緞綢等件援案請

旨改派江浙織造照式恭辦並酌擬籌撥協濟恭摺仰祈

聖鑒事竊准內務府咨稱附奏長蘆鹽政等處織辦緞綢等項由

各該督撫籌撥織辦一片奉

旨依議欽此鈔奏開單咨行辦理前來事關

實用要需亟應敬謹籌辦惟查直隸地方向不產絲長蘆亦未設

有織局機張樣譜一無籌備又無諳練匠役可雇此次奉派織辦

費用各色緞綢紗縐其計二萬件若委員赴南省采辦既非管轄

之區市肆商賈勢必擡價居奇件色眾多急切尤難齊備況傳辦

內用綢物均有一定式樣民間常用之物不能合宜查江甯蘇州

浙江等省設有織造專局造辦

內府需用物料該處既有舊頒譜樣又有官募匠役機張器械織辦較易即就近收買定織亦能合式溯查同治七年内務府奉旨傳令長蘆鹽政織辦

上用龍衣緞疋等件經前署督臣官文以力難創辦奏奉

諭旨改派江蘇織造照式織辦應需款項仍由長蘆運庫籌撥作正開銷此次奉文傳辦各件既數倍於上屆期限又復緊迫若由長蘆勉強創辦斷難應手臣與司道等再四籌商惟有援照成案籲懇

恩准改派江浙蘇州杭州各織造查照單開各件敬謹分投織辦陸續呈進庶可無誤要需其應需銀兩仍由各該織造核實估計月議協撥惟此次傳辦各項活計件數較多需費恐不下二十餘

萬兩直隸本係缺額之區庫儲極絀又因上年水災籌辦賑撫修築河隄羅掘一空目前實無款可挪而奉

旨傳辦文內江浙織造各有清單一件誠恐該織造等以本省籌款維艱勢難兼顧計惟於未奉

派辦力稍有餘之省酌請協濟可否請

旨收下湖北江西安徽山東各督撫臣無論何款各迅速撥銀三萬兩解交該織造代爲織辦其不敷之數容臣督飭藩運兩司儘力湊撥照案作正開銷似此通融籌辦在外省既眾舉易舉而內庫亦儲備有資除咨內務府知照外所有援案懇請改派織辦並籌撥經費各緣由理合恭摺據實覆陳伏乞

皇太后

皇上聖鑒訓示謹

奏

驛站因糧變通造報摺

同治十一年三月初一日

奏爲直省舊案驛站雇夫價銀等項及因糧衣等款報銷細冊實難補造仍懇一律變通辦理以清積贖恭摺仰祈

聖鑒事竊查直省道光二十九年以後驛站錢糧並三十年以後因糧衣等項報銷因歷年軍務頻仍並上年淫雨爲災各屬案卷未全支用細數難以查考以致不克造報前准兵部奏催行令酌量辦理經臣飭司籌議變通章程將節年末辦銷冊請截至同治九年止作爲舊案飭屬查明歲支總數造具簡明清冊報部核銷概免造報細冊並免歷年遲延處分奉

旨著照所請兵部知道欽此當經行司遵辦嗣准兵部以驛站項下馬騾驢頭草料馬夫等役工食買補馬騾價銀馬匹雜支等項例有額支數目自應免造細冊惟雇民夫價銀應付車輛廩給

口糧等項每年用款多寡不一若均免造細冊部中無憑核辦應將曾經被擾之處免其造報外其未經被擾各州縣仍令補造各項細冊報部等因奏奉

諭旨咨行到臣又經轉飭遵照去後茲據署按察使陳鼎詳稱遵查此項報銷現奉兵部議令查明州縣已未被擾分別辦理原爲慎重帑項起見惟驛站雇夫等項每年支用多寡雖有不同然每夫每車價銀若干每官每役廩給若干例有一定章程各站奉文支應均係遵照部票勘合辦理不能絲毫增減且經本管道府廳州逐一查核加具並無浮冒印結由司覆核彙冊詳送核

題似與漫無稽察者迥不相同直省軍興以來雖各州縣不皆被擾而應核卷宗委因歷年過久散失不全加以上年夏秋霖雨三月司署科房坍塌業蒙奏明有案聞省州縣科房亦大半倒塌滲

漏案卷霉爛實已無處不然今若分別已未被擾州縣復飭補造
細冊不特彙辦之案繁飭兩歧霉爛之餘挂一漏萬且以二十餘
年之積牘查細數於檔冊散軼之後勢必查清無目舊案未了新
案又增年復一年伊於胡底是徒有清理之名並無清理之實案
牘久懸仍於帑項毫無裨益自應欽遵前奉
諭旨一律免造細冊以期迅速而免積壓等情請

奏前來臣覆加酌核係屬實在情形合無仰懇

天恩俯准將同治九年以前舊案驛站雇民夫應付車輛廩給
口糧等項無論已未被擾州縣應與馬騾驢頭草料夫役工食買
補馬騾價銀馬匹雜支及囚糧囚衣等款概免查造細冊仍將歲
支總數彙案確核造具簡明清冊報部核銷具同治十年以後新
案奏銷嚴飭依限分晰造報以符定制除咨兵刑戶三部外所有

直省舊案驛站雇夫價銀及囚糧衣等款報銷細冊實難補造仍懇一律變通辦理緣由理合恭摺具

奏伏乞

皇太后

皇上聖鑒訓示敕部核准施行謹

奏

籌辦工賑並赴津日期片

同治十一年三月初一日

再上年被水各屬冬賑早已放竣春融凍解以後積水漸涸惟天津附近各縣窪區尙有水二三尺不等臣飭天津道丁壽昌遴派委員於海河兩岸多挑引河疏通入海值此青黃不接民生困苦異常福建購運賑米四萬石已由輪船陸續運津臣前派員分赴江蘇奉天東豫等處采辦糧石亦可先後進口先期已將各州縣存賑糧數按照災分輕重戶口多寡均勻酌派次第備船分撥運交嚴飭印委各員會督紳董核實散放不准稍有弊混津邵聚集難民最多去冬奏明分設粥廠粥廠及留養局至本年二月百日限滿飭據籌賑局司道議准再行展放一箇月口糧惟天氣漸暖聚處易生瘟疫其籍隸各屬者又爲籌給銀米捐湊錢文分別資遣令其回就存賑藉事耕作目下高地麥苗漸已秀發惟窪區麥

未能種且恐有秋禾失望之處窮民轉徙溝壑爲日甚長極堪憫
惻庫款支絀無可挪貸惟有設法勸捐酌量拯助求盡其心力所
能爲者而已至直省各河道淤淺專恃隄防以衛農田軍興後剋
減經費失修已二十年加以此次洪水到處衝塌必須及時修築
臣處民窮財盡之地百計拮据永定河雖湊撥三十餘萬兩只能
擇要興工尙難大加浚治據報蘆溝橋水口兩壩已進占一百一
十餘丈三月間冀可合龍此外大小清河開段沙淤衝決南北運
河隄岸塌陷尤多各處支河無不壅阻現分委委員勘估亦擇其
最險要者籌款集捐廣召民夫以工代賑並令各防營勇就近幫
同興築稍爲補苴罅漏之謀臣擬於三月初三日由保定馳赴天
津暫駐籌布一切省署日行事件仍委藩司代拆代行所有籌辦
各屬春賑及河工大概情形並由保赴津日期理合附片具陳

伏乞

聖鑒謹

奏

口外兵餉應就近支放摺

同治十一年三月十四日

奏爲口外征兵餉項應仍由各城就近支放未便由內地經理恭摺會

奏仰祈

聖鑒事竊臣等欽奉同治十年十二月二十七日

上諭奎昌等奏仍請飭派口北道總辦各軍糧餉一摺口外各軍餉銀前疊據李鴻章奏未便由內地遙爲經理惟奎昌等所奏亦係爲慎重餉需起見應如何辦理之處著李鴻章額勒和布悉心會商妥議具奏等因欽此遵卽恭錄往返咨商並飭據口北道奎斌迅將如何變通辦理詳細議覆前來臣等逐加會核伏查口外西北各城距口數千里或萬餘里前後氣脈本難聯貫行營餉項按月酌發尤非內地所能懸揣惟前因烏城等處不產糧食議在

張家口設立後路糧臺專辦各軍米糧其營中月餉奏明歸各城就近支放旋由前將軍福濟議立糧臺調派司員經理戶部以部員未能通曉蒙文議令金順在甘肅糧臺酌帶委員赴烏辦理奏奉

諭旨飭遵嗣杜嘎爾以所部軍餉請責成口北道經理復經臣鴻章查明窒礙情形據實覆陳奉

旨切庸更張或併歸金順糧臺籌發或仍由杜嘎爾自行奏撥支放令其妥商辦理等因是征兵米糧應由糧臺辦運各軍餉銀應由各城支放疊經

奏准在案今奎昌等仍欲將餉銀併歸口北道經理自爲省事起見惟是遠道馳送臺站或有疏虞文報阻遲而稽無從稽覈收扣帳目稍有轉轉非所以慎重帑項師行緩急不能接濟亦必至貽

誤軍情向來帶兵大員餉項雖由後路轉解而必須由行營支放者非此則於行軍實多不便若不計路之遠近不問事之可否勉強遷就徒欲省事而適以誤事臣等所不敢出此也現在口外各路兵勢已分斷難強令由一處放餉尤不能強令由數千里外之糧臺放餉竊謂吉林馬隊五百名調赴伊犁黑龍江馬隊五百名調赴哈密應歸榮全景廉隨營放餉杜嘎爾所部察哈爾吉黑馬隊僅存一千七百餘名業經自行奏請餉銀支放應仍循舊辦理其駐紮烏城之吉黑馬隊五百名自應由烏城就近放餉以歸一律糧非土產故須口內解交餉可輕齎則須行營酌放此係一定之理無可推諉臣等體察情形只能實令口北道辦糧未便再責令該道放餉致有貽誤所有遵

旨會議緣由謹據實合詞由驛覆

奏伏乞

皇太后

皇上聖鑒訓示謹

奏

日本使員到津片

同治十一年四月初三日

再上年日本使臣伊達宗城等來津議約經臣遵

旨督同江蘇臬司應寶時津海關道陳欽與該使臣多方辯論議
立修好條規通商章程各一本訂明俟一年之後另行派員來華
換約由臣先後

奏報在案茲據江海關道沈秉成津海關道陳欽節次稟報該國
現派上年來津議約之外務大丞柳原前光外務少記鄭永留等
隨帶僕從四人於三月十六日抵滬是月二十九日到津並據探
稱該國因派大臣往西洋各國改正外交條例上年與中國所定
條規恐與新擬條例不合內有二三條須商求酌改以便屆時派
員互換等語臣審其來意殊爲狡變暫未與該使員接見飭令原
派幫同議約之津海關道陳欽並添派在津差委之江蘇記名海

關道孫士達與該使員往復辯駁候稍有端倪臣再與面晤相機
開導總當堅守前議不稍鬆勁除將現辦情形隨時咨函商請總
理衙門核示辦理並俟妥議定奪詳晰陳奏外所有日本使員到
津日期理合附片由驛具陳伏乞

聖鑒謹

奏

奉辦緞綢請酌減摺

同治十一年四月初四日

奏爲奉辦

實用緞綢等件需款過鉅實難全數籌解擬請酌量減辦以供要需恭摺具陳仰祈

聖鑒事同治十一年四月初二日欽奉初一日

寄諭德壽奏長蘆改派綢緞懇寬限辦理一摺長蘆奉派活計前改派各織造分辦限於五月內呈交茲據德壽奏稱現在機匠難以選舉且直隸撥款未到勢難依限辦解所有長蘆改派綢緞著寬限兩月一律辦齊解京不得再遲其直隸撥款著李鴻章趕緊於四月初間解往俾資撥辦弗稍耽延等因欽此遵查前蒙恩准改派織辦並准協撥銀兩當經臣遵

旨按照原單各就土宜物產最多之處酌量分派月開清單飛咨

江甯蘇州杭州各織造辦理仍請其逐細摺節估計實需工料銀若干兩先行咨覆以便籌撥並咨內務府衙門查照一面分咨湖北等省各督撫迅將奉撥銀兩如數籌解旋准各省咨會安徽銀三萬兩就近全解江甯織造備用湖北銀三萬兩解存江甯藩庫候撥山東銀三萬兩已分解江浙三處惟江西省尚未准咨明撥解其工料銀數現准江甯蘇州織造來咨江甯需銀十五萬九千四百三十八兩三錢蘇州需銀十九萬四千三十四兩杭州雖未估到而分派疋件與蘇州不相上下大約亦須十九萬餘兩三處併計約共需銀五十四萬兩有奇臣前摺內聲明約計奉派緞綢紗縐其二萬件需費不下二十餘萬兩請撥湖北等四省十二萬兩不敷之數由直省儘力湊撥月餘以來籌措尙無頭緒實緣直省著名瘠苦常年額支款項必須請撥加以上年水災甚重疊

經臣奏奉

恩旨撥給銀米因不敷散放復由本省南省官紳合力捐助藉資接濟迄今各屬積水未盡消退災民覓食維艱尙應賑撫運庫課款亦因被災商力不支奏准展緩司庫上忙地丁除去緩徵所入不敷所出關稅本未暢旺又有專款開銷驟難兼顧他款今據江甯蘇州咨函單內所載大卷係屬兩件一連統按大小卷件數計之約有三萬件之多又

內廷活計尺寸式樣迥非民間常用可比照例核計工價統需銀五十餘萬兩自係實情前項工料除協撥之外約尙需銀四十二萬餘兩直隸災府之區斷難籌足他省庫款亦未充裕未便一再協濟臣伏思此項

實用緞綢等件

典禮攸關直省應撥不敷工料如果力可通融萬不取程事掛誤
乃核計所需實屬難以如數若不統籌全局據實陳明必致臨時
貽誤且聞南省市僧因各織造均有本省奉派活計需用工料甚
急遂聚行把持居奇擡價以致織辦甚形棘手據此情形再加長
蘆改派之項即使銀兩湊手亦必糜費踰期況直省款尙懸虛辦
理益形竭蹶再四籌商惟有籲懇

天恩將原派長蘆各件可否先行照單減辦一半約已有一萬數
千件暫供要需計直省尙應撥銀十五萬兩左右無論如何爲難
臣必督飭司道設法竭力挪湊儘四月內分解各織造趕緊織辦
當不誤七月一律呈進之期所撥銀兩仍遵

旨作正開銷隨時咨明戶部並分咨查照外所有奉辦緞綢等件
需款過鉅實難全數籌解擬請先行照單減辦緣由理合恭摺

陳伏乞

皇太后

皇上聖鑒訓示謹

奏

修濟洛河工程摺

同治十一年四月初八日

奏爲籌修廣平順德境內洛河工竣酌獎在事出力員紳恭摺仰祈

聖鑒事竊查直隸廣平順德二屬舊有洛河一道自山西武安縣入臨洛關經永年雞澤南和任縣至趙州之甯晉泊東入於海沿河建有閘座從前兩岸村莊藉水灌地獲利甚溥又有牛尾河一道專洩永年西南各村積水亦歷雞澤平鄉任縣至甯晉泊乾隆二十四年洛河決口南趨併入牛尾河河身窄小宣洩不及致下游雞澤等縣歲被水患而洛河頻年淤墊逐漸增高牛尾河地勢愈低積流成渠屢次議修迄無成效同治十年據南和縣紳民稟經該管順德府知府任道鏞詳由臣檄飭廣平府知府長啟一體勘辦委員分往會同各縣傳集紳士詳詢籌商議就各該縣沿河

村莊按畝出貲派夫通力合作嗣據署永年縣知縣錢敏等先後稟報於上年五月興工至本年三月次第告竣經臣檄委候補直隸州知州吳榮馳往會同順德府知府薛斯來廣平府知府長啟逐段驗收所修隄壩用三合土夯砢穩固工料堅實河身亦一律挑挖深通復歸故道稟覆前來臣查洛河水道係畿南兩府一州利害所關自乾隆年間決口南趨淤墊日久水勢就涸沿河村莊既失灌溉之利下游各縣歷受漫淹之害經臣督屬籌議修濬百年淤廢一朝興復於農田民生大有裨益而永年所屬洛河四十二里有奇計工長七千六百四丈並堵築牛尾河頭大壩一道土埝一道迎水壩一道又修築隄工七百六十八丈工程尤鉅在事官紳集捐興工晝夜督率時逾半年之久未費絲毫帑項卒能堵築決口使數百里內積患頓除閭閻其霑利益實爲異常奮勉未

便沒其微勞除其次出力員紳由臣查明核給獎敘並經各該地方官酌給花紅匾額以示鼓勵外所有尤爲出力各員紳謹酌量擬獎繕具清單恭呈

御覽伏懇

天恩分別照准俾昭激勸理合恭摺具陳伏乞

皇太后

皇上聖鑒訓示謹

奏

庫防練餉請加撥摺

同治十一年四月十七日

奏為遵撥調防庫倫練軍餉需並練餉不敷仍請照案由部加撥恭摺仰祈

聖鑒事同治十一年三月十八日欽奉十七日

寄諭張廷岳阿爾塔什達奏請將戍守庫倫宣古兩軍仍由直隸協餉項下撥解一摺據稱直隸練軍餉項向由長蘆等處籌撥現在庫倫戍守之宣化古北口官兵統計二千餘名月需餉銀一萬餘兩此外支放蒙古官兵等項為數尙多宣古官兵月餉現既在庫倫支領則原餉自在兩鎮存儲請將該兩軍月餉仍由直隸練軍餉內撥解等語庫倫防守緊要餉需短絀自係實情所有宣古兩軍餉項即著李鴻章自奉旨之日起由直隸練軍原餉內按月照數委解張家口轉解庫倫如一時接濟不及仍著張廷岳等由

庫墊放俟解到時再行歸款等因欽此遵卽飭局籌撥去後茲據練餉局司道具詳直隸練軍餉需原定每月由部庫撥銀四萬兩江海關撥銀三萬兩長蘆撥銀一萬一千兩經前督臣曾國藩奏明將來如有短絀再行奏請飭撥自上年宣化古北口兩軍赴庫以後因西北空虛邊防喫緊卽於宣化添練馬隊一營又因大名爲畿南咽喉重地界連豫東時有匪徒出沒原有軍隊不足分防遂添練步隊兩營其舊練各軍亦均改從新章需餉較多先後咨部有案練軍既有添設餉需亦應加增前因該兩軍月餉由庫支領直省藉資挹注不卽請加至各軍餉銀向係由局於撥到協餉內彙核支發並非各歸各鎮統計每月所入本非寬裕兩鎮更無存儲原餉今該兩軍月餉仍歸直省撥解進款僅止此數出款較增於前斷難敷用但庫倫防守緊要不得不先其所急竭力籌湊

直餉不足局再議請添撥以符原奏該兩軍三月分餉銀諒已由庫支放應請以四月初一日起由局照數撥解免其截口扣算並請按兩月併解一次現將四五兩箇月餉銀設法籌足卽委員解交張家口糧臺轉運赴庫等情請

奏前來臣查宣古兩軍月餉由直省練軍原餉內按月照數委解該司道等議以四月初一日起及按兩箇月併解一次係爲簡捷起見不致稍有短缺惟距庫過遠塞外臺站井內地驛路可比恐致阻滯未能迅速解到應由庫倫大臣等隨時體察如有接濟不及遵

旨由庫墊放俟直餉解到卽行歸款免誤軍食至廣東等十省協直固本軍餉改解部庫月共銀五萬五千兩自七年十月前督臣官文籌議酌留兵勇每月僅由部撥四萬兩嗣會國藩接任釐定

新章將各標兵酌加抽練曾經奏明練軍增至六千或八千每月仍請由部加撥二萬兩經戶部議准在案臣莅任兩年將練兵防兵疊加整飭因宣古練軍遠調腹地空虛又飭大名宣化通永各鎮添練馬步一千五百名現計共增至六千餘名已符曾國藩奏准加撥原案初以庫倫戍兵無須勻撥月餉尙可周轉茲既遵旨仍由練餉撥解庫防嗣後發款必形短絀應請

旨敕下戶部自本年六月分起由各省解到回本項下暫行按月加撥一萬兩以符原奏而資分撥除局將庫防四五兩箇月餉銀卽日湊解並分咨查照外所有遵撥戍庫練軍餉需並練餉不敷請照案加撥緣由理合恭摺具

奏伏乞

皇太后

皇上聖鑒訓示謹奏

承屬鹽務情形摺
同治十一年四月十七日

奏為

查明承屬鹽務情形恭摺陳仰祈

聖鑒事竊臣欽奉同治十年八月二十一日

上諭御史赫昌奏稱承平府屬鹽務自改歸官運後分司王鍾霖

辦理未善復歸灤州經理該州鹽吏門丁有私自運銷情弊濟民

場大使蔣嘉泉畏罪稟訴雖經運司嚴飭認真掣配該分司並未

照辦且所得餘利悉以肥己亟須更改章程揀派廉員前往試辦

各等語承平鹽務歸地方官經理有無流弊是否必須派員承辦

方臻妥善著李鴻章查明實在情形斟酌辦理分司王鍾霖等如

實有侵蝕鹽課情事即著從嚴參辦以儆官邪原摺著鈔給閱看

等因欽此遵即飭派候補道徐繼鏞前赴承平督同該府體察實

在情形據實議辦並飭長蘆運司悉心會議稟覆核辦去後茲據會詳稱該道徐繼熊馳往永平督同該府桐澤調取薊永分司同治六年發鹽單簿濟民場收鹽紅簿及該場大使蔣嘉泉七年冬間在分司處稟訴各據並將該御史原奏各節逐細訪查會同籌議詳請覆

奏前來臣逐加確核查原奏內薊永分司王鍾霖承辦鹽務侵蝕肥己並灤州鹽吏門丁私自運銷一節據王鍾霖稟稱該員於同治六年春奉委試辦永屬鹽務甫將設立巡汛置造廠店雇募鹽勇扒毀私灘等事辦有就緒未及運鹽售賣旋奉前山海關副都統長善以鹽禁太嚴有拂民情奏請停止卽行稟退彼時鹽未運賣賠累不堪安能另有餘利侵食自肥灤州歷年配運鹽數均有場中紅簿可查並據現任知州游智開稟稱該州與遷安盧龍配

運場縣向係遵照定章預訂場員請撥分司官秤公司盤收委非
鹽吏門丁等所能私運臣查永平鹽務自改歸官運後該分司認
辦未久尙未迎鹽即經稟退無從獲利肥己灤州鹽吏門丁查無
私行運售之事該州游智開甫經抵任無所用其迴護所稟自屬
可信其濟民場大使稟訴分司一節詢據該大使蔣嘉泉稟稱永
屬灤州巡安盧龍額定引目九千八百七十道應歸該場配運向
由地方官定期移知該場公同盤散生鹽入廠後始聽分配銷售
盤鹽官秤照例由分司飭發同治七年前任灤州知州鄧錫恩向
分司處請發官秤逕自赴場盤散未經預期移訂該大使因鄧錫
恩迹近欺陵是以赴分司前而訴當經王鍾霖諭飭照章公盤寢
事委非畏累申訴亦未具稟有案又灤州於同治四五年七三年僅
正四年裁領二三兩年額引四千三百六十四道又於八九十三

年內請領過七八九三年引目其四五兩年因馬賊滋事額引實未領運此外各縣亦因銷滯多有延欠均經運司將歷年已未完引目確數詳明咨部有案弔查呈驗掣簿紅簿均屬相符至該御史所議遴委賢員自籌運本前往試辦一節查永平引岸廢弛多年毗連關外海濱梟匪往來勾聚貧民以販私爲生活紳富食私亦不以爲怪該府爲通綱最要門戶廢置固有妨大局屬禁則又拂輿情操之過蹙尤有得不償失之虞前此改歸官運未覩成效是以仍由各州縣自行運銷以期逐漸整頓若另行派員承辦無論自籌運本力有不支又恐官不諳商徒滋紛擾於鹽務仍無補救現據該司道等考證已往之利弊揆核現時之情形惟有招募殷商前往認充不惜巨貲不求速效必須慎選得人由通綱結保舉充再行遞派大員統率緝私因時制宜督同辦理庶克有濟惟

直隸災歉之餘商力極形疲憊凡飭招商認充欲辦者艱於措貲
殷實者率恐賠累一時實難其選應請仍歸各州縣暫行經理責
成該地方官廣設巡汛緝拿私販疏銷官引爲得尺得寸之計總
使煎陸腹地引岸不致受私鹽侵灌之害仍俟由司招募得人卽
行接替認辦至煎永分司王鍾霖查無侵蝕肥已灤州鹽吏門丁
亦無私行運售情事均請毋庸置議所有遵

旨查明永屬鹽務情形理合據實恭摺陳伏乞

皇太后

皇上聖鑒訓示謹

奏

防營修築南運河隄並捐賑捐

同治十一年五月初八日

奏爲調派防營修築南運河隄工竣並籌辦青縣靜海捐賑粥廠查明尤爲出力人員酌擬獎敘恭摺仰祈

聖鑒事竊查直隸南運河兩岸河隄數百里關係糧鹽運道保衛各屬田廬每年額定歲修銀一萬五千兩搶修銀六千兩至咸豐四年奉部核減一半按銀票各半折發每千兩僅領實銀二百五十兩又因報銷遲延遞年扣留未發印汛員弁無款預備料物臨時搶險竭力墊辦亦屬無幾隄身衝毀殘缺卑薄日甚每遇大汛盛漲動輒潰決淹沒民田上年雨水過多河流泛溢滄靜等處地居下游隄防虛設一片汪洋被災尤重亟須設法修築以資捍衛向來河工照例歲修之外遇有大修工程月請巨帑委員估辦茲值帑項支絀無可籌措又未便任其廢弛臣所部淮軍轉戰十餘

年平日操練之暇每督將士講求築壘挖濠之法藉習勞苦於興
築隄壩事宜結實可靠因飭駐防青縣馬廠之統領盛仁等軍前
甘肅涼州鎮總兵記名提督周盛波督飭所部弁勇就近承修滄
州青縣靜海一帶河隄二百餘里經該提督親往逐段履勘各處
險工草壩木椿已衝失無存龍鳳口南塔寺等處歲歲搶修隄身
愈壞其餘頂衝塌灣之處侵刷年久僅存一縷縷隄難支巨浪卽
近年新修各隄均因取土太近跌塌過深岌岌莫保查河工築隄
向準河片形勢平灘之處舊有月隄以備放淤高阜之區舊有遙
隄以爲外衛今則到處坍塌隄內附近村民希圖便捷又私挖缺
口往來農車此次土工一興無論平險處所必須一律培補爲十
年不拔之基該提督勘度略定卽派中軍五營由靜海東岸唐官
屯修至泊州左軍統帶提督賈起勝三營接修至靜海城邊前軍

統帶提督周壽昌由靜海西岸修至唐官屯對岸仁軍統帶提督
唐仁廉接修至流河鎮南盛正營緊接仁軍修抵青縣之蔡莊石
軍統帶提督衛汝貴四營由蔡莊修至滄州其計木工二千十七
丈有奇土工四千八百丈有奇各該營督飭弁勇加勁趕做極險
處所木椿每用二三層釘入土中五六尺葦柴逐層圍裹復恐土
壓木斜日久搖動於直椿外再以長木鎚入土埂八九尺伸出椿
外鑿通圓眼用橫木穿過兩面釘緊鉤縮攔截俾椿力足禦衝盪
此皆河工下椿未有之例該營官等創爲此法期於經久土工則
層土層礮百鎚不動然後添土又新土壓入老埂三步俾其結實
黏連挑土均在十丈以外不准絲毫傷動隄根舊隄殘缺單薄處
所一例加寬自四五丈至十一二丈不等隄埂高出平陸均在七
尺以上中簣外斜使雨水不至漫漬巨隄彌望縣耳如脊復慮河

岸淤沙遇水衝卸凡貼水當衝之處擇取板泥加工緊築分插葦
稻柳枝以爲外衛或取草根貼植日吸河水灌之使活俾宿草蟠
結水不內侵一切做法凡可以堅實耐久者不惜十倍工力破除
成格一氣呵成計自三月初九日興工至四月二十三日竣事僅
四十五日其用長短木樁一萬九千六百四十八根秫秸四十九
萬八千一百斤蘆葦三千五百束以及製辦鋤鋤耨耨柳筐担各
項弁勇鋪草柴薪匠役工食一切腳價其用錢合銀一萬三千三
百一兩二錢一分六釐實屬異常節省業由臣轉飭天津道丁壽
昌於淮商捐賑項下照數撥發統計該軍修築運河兩岸隄工二
百餘里承積年廢壞之後大加整理力求堅實耐久除籌給料價
銀兩外餘皆兵夫胥胥力作約合土方四十餘萬若按方估計動
用民夫糜款不下七八萬金亦已節省不少詢諸河干父老僉謂

數十百年未有之工臣派員逐細勘驗委係工料加倍堅實足禦
盛漲又滄州靜海青縣等處上年水災最重居民流離失所雖經
臣籌撥銀米分派印委照章賑撫無如災區過廣博濟爲難該提
督周盛波駐防青境營規整肅兵民極爲和協各營弁勇不忍坐
視飢民困苦而不爲拯救該將領員弁於餉需竭蹶之時作解衣
推食之舉共捐銀一萬一千四百餘兩周盛波並倡捐厯年節存
薪費銀四千兩購買大米雜糧七千九百五十六石有奇擇運河
東西岸極苦之新張屯南辛房等六十餘村莊大小二萬五千三
百三十四口按戶均攤人給一斗自十二月二十日開局散發至
二十四日放竣飢黎得以度歲入春以後復於青縣城及馬廠鎮
靜海之唐官屯分設粥廠三處專賑極貧戶自二月十五日開
廠至三月十五日截止每日給米三合所收男婦大小三萬

五千七百五十餘口日需米一百八十石有奇撤廠之日仍按大口一斗小口五升給領遣歸又用小米雜糧五千四百二十二石薪棚鍋帶柴薪雜費銀八百三十餘兩均由該提督等捐辦並據聲稱該統帶營官等踴躍樂輸不敢仰邀

獎敘惟承辦各營員查戶散糧設廠賑粥先後五閱月不分風雨晝夜悉心籌畫實惠及民又修築河隄二百餘里事事認真覈實不辭勞瘁以操防軍士兼爲地方救災捍患大有與民相親之意輿情愛戴甚屬可嘉似不可不略予鼓勵所有尤爲出力員弁謹遴擇七人酌擬獎敘繕具清單恭呈

御覽仰懇

天恩俯念此次該營修河隄捐辦賑務著有實在勞績均非恒中本分應辦之事准照所請分別給獎以勸將來出自逾格

慈施所有軍營辦修滄靜南運河隄工竣暨捐辦青靜賑務各緣
由理合恭摺具陳伏乞

皇太后

皇上聖鑒訓示謹

奏

永定河開壩工竣摺

同治十一年五月初八日

奏爲籌修永定河金門開壩工竣恭摺仰祈

聖鑒事竊查永定河南二工金門開舊有減水石壩一座每遇大汛盛漲隨時宣洩賴以分減水勢歲久失修竟成淤廢遂年年有漫決之虞臣去冬親往履勘飭委永定河道李朝儀留直補用道周馥逐細勘修並將董村引河一律挑挖深通共估需銀六萬四千七百餘兩飭於秋災賑撫項下籌撥購料集夫及時興辦以工代賑本年正月十九日奏蒙

聖鑒在案嗣據該道等先後稟報現辦工程分數復委道員魏承樾馳往會督趕辦茲據稟稱此項工程以灰石爲大宗須赴房山縣出產地方采購上年永定南溢運道水阻又值天寒日短鑿石無多深慮料物難齊大汛前不能竣事再四設法先將所需石灰

二百餘萬斤趕雇車駝總道運送多添夫匠在山設廠將應用石料鑿齊一面飭匠拆卸舊龍骨海墘堅築底盤灰土等工附近民夫傭工就食每日約五千餘人迫水口大工合龍後道路乾涸會督在事各員分雇車輛將山內廠石晝夜趲運間上亦添匠趕緊修築石料均取堅厚整齊多嵌寬厚鐵釘灰漿攪用米汁椿埽各工概求穩密截至四月三十日止所估龍骨升高放坦尺寸及修補金牆海墘鑲砌埽段挑挖引河等工均一律照估如式完竣該道魏承樾查照原估尺寸逐一量驗據稱委係工堅料實並無草率偷減盛漲足資分洩於宣防甚有裨益各委員督工精勤辦理尙爲安速除飭將用過銀數片行核實造冊報銷外所有籌修金門開減水石壩工竣緣由理合恭摺具陳伏乞

皇太后

奏
皇上聖鑒謹

撥解緞綢價銀摺

同治十一年五月初十日

奏爲各織造分辦長蘆奉派緞綢應需價銀遵

旨撥解作正開銷恭摺仰祈

聖鑒事同治十一年四月初七日欽奉初六日

寄諭李鴻章奏奉辦緞綢等件需款過鉅請酌量減辦一摺據稱
長蘆奉派活計前經咨照各織造分辦統計江南蘇州杭州三處
共需銀五十餘萬兩除湖北等省協撥外尙需銀四十二萬餘兩
直隸災瘠之區實難如數籌撥請將原派長蘆各件先行照單減
辦一半等語自係實在情形著照所請所有長蘆應辦緞綢等件
准其照單減辦一半卽著李鴻章將應撥款項迅速分解各織造
以便趕辦務於七月內一律辦齊解京勿稍延緩等因欽此遵查
江南織造來咨估需全價銀十五萬九千四百三十八兩三錢按

減半截零應撥給銀七萬九千七百兩蘇州織造來咨估需全價銀十九萬四千三十四兩按減半截零應撥給銀九萬七千兩其時杭州織造尙未估到應先撥給半價銀八萬兩三共應撥銀二十五萬六千七百兩內除山東江西安徽湖北四省協撥銀十二萬兩已經各督撫先後奏咨或分解或全解應由各該織造查收備用外實計直省應添撥銀十三萬六千七百兩查此項價銀前經臣奏奉

諭旨作正開銷自應統計司道各庫情形酌量分派以期力可籌湊不致竭蹶誤期當經商飭運司籌銀五萬兩藩司籌銀二萬兩津海關道籌銀三萬六千七百兩練餉局撥銀三萬兩無論如何爲難必須儘力籌足旋據署運司恩福以此時正課尙未啟徵庫款竭蹶因設法挪借銀五萬兩將來徵起正課卽於應解京餉項

下照數截抵歸款據藩司孫觀於司庫地糧項下籌撥銀二萬兩
據津海關道陳欽於天津鈔關奉撥本年京餉常稅項下動撥同
治九年九月至十年八月徵存內務府額外盈餘銀六千五百三
十八兩二錢二分又徵存戶部正餘銅斤水腳飯平及經費節減
等項銀三萬一百六十一兩七錢八分其合三萬六千七百兩之
數又據練餉局司道於庫存協款內照撥銀三萬兩先後具詳前
來並以遠道解往既多糜費又恐阻滯先經分飭揚州糧臺分局
江海關蘇松太道於應解直防淮軍及應協直省練軍月餉項下
就近照數劃撥分解江浙各織造以便趕辦依限呈進卽以直省
司局關道籌撥銀兩抵放各軍月餉應請

敕下內務府戶部將撥解前項織辦緞綢要件價銀欽遵前奉
諭旨一律作正開銷並將長蘆運司及天津鈔關應解京餉常稅

如數劃除卽由該司局關道等各於奏銷案內造報至杭州織造
現准估到半價除已撥解銀八萬兩尙不敷三千餘兩應俟織辦
就緒核實商計是否必須添撥酌量辦理再行奏咨所有撥解各
織造銀兩

旨作正開銷緣由理合恭摺具陳伏乞

皇太后

皇上聖鑒訓示謹

奏

籌議製造輪船未可裁撤摺

同治十一年五月十五日

奏爲遵

旨通盤籌畫製造輪船未可裁撤仍應妥籌善後經久事宜恭摺
密陳仰祈

聖鑒事竊臣欽奉同治十一年二月三十日

密諭前因內閣學士宋晉奏製造輪船糜費太重請暫行停止當
諭文煜王凱泰斟酌情形奏明辦理茲據奏開省輪船原議製造
十六號定以鐵廠開工之日起立限五年經費不逾三百萬兩現
計先後造成下水者六號具報開工者三號其撥解經費截至上
年十二月止已撥過正款銀三百十五萬兩月解過養船經費銀
二十五萬兩用款已較原估有增造成各號輪船雖均靈捷較之
外洋兵船尙多不及其第七八號船隻本年夏間方克竣工第九

號出洋尙無准期應否卽將輪船局暫行停止請旨遵行等語左
宗棠前議創造輪船用意深遠惟造未及半用數已過原估且禦
侮仍無把握其未成之船三號續需經費尙多當此用款支絀之
時暫行停止固節省帑金之一道惟天下事創始甚難卽裁撤亦
不可草率從事且當時設局意主自強此時所造輪船旣據奏稱
較之外洋兵船尙多不及自應力求制勝之法若遽從節用起見
恐失當日經營締造之苦心著李鴻章左宗棠沈葆楨通盤籌畫
現在究竟應否裁撤或不能卽時裁撤並將局內浮費如何減省
以節經費輪船如何製造方可以禦外侮各節悉心酌議具奏等
因欽此仰見

聖主力圖自強規畫遠大欽佩莫名臣竊維歐洲諸國百十年來
由印度而南洋由南洋而東北闢入中國邊界腹地凡前史之所

未載互古之所求通無不款關而求互市我

皇上如天之度慨與立約通商以平龍之合地球東西南朔九萬里之遙胥聚於中國此三千餘年一大變局也西人專恃其鎗礮輪船之精利故能橫行於中土中國向用之弓矛小鎗土礮不敵彼後門進子來幅鎗礮向用之帆篷舟楫艇船礮划不敵彼輪機兵船是以受制於西人居今日而曰攘夷曰驅逐出境固虛妄之論卽欲保和局守疆土亦非無具而能保守之也彼方日出其技與我爭雄競勝單長較短以相角而相凌則我豈可一日無之哉自強之道在乎師其所能奪其所恃耳況彼之有是鎗礮輪船也亦不過創制於百數十年間而浸彼於中國已如是之速若我果深通其法愈學愈精愈推愈廣安見百數十年後不能攘夷而自立耶日本小國耳近與西洋通商添設鐵廠多造輪船變用西洋

軍器彼豈有同西國之志蓋爲自保計也日本方欲自保而偪視我中國中國可不自爲計乎士大夫則於章句之學而昧於數千年來一大變局壯於目前苟安而遂忘前三三十年之何以創鉅而痛深後千百年之何以安內而制外此停止輪船之議所由起也臣愚以爲

國家諸費皆可省惟養兵設防練習鎗礮製造兵輪船之費萬不可省求省費則必屏除一切國無與立終不得強矣左宗棠創造閩省輪船曾國藩仿造滬局輪船皆爲

國家籌久遠之計意不知費鉅而效遲哉惟以有聞必先不敢惜目前之費以貽日後之悔該局至今已成不可棄置之勢苟或停止則前功盡棄後效難圖而所費之項轉成虛糜不獨貽笑外人亦且浸長寇志由是言之其不應裁撤也明矣至奉

旨詢及經費如何減省一節聞廠相距過遠臣實不知其詳但就
滬津機器各局情形推之凡西人製器往往所製之器甚微而所
需以製器之器甚鉅機器重大必先求安置穩固之地培土釘椿
建廠添屋不惜工本積累歲月而後成其需用器具缺一不備則
必各件齊全方能下手而選料之精必擇其良而適用者恰合尺
寸不肯略有遷就其不中繩墨皆在屏棄之列又經營構造時有
變更或甫造未成忽然變計則全料已經拆改廢棄且以洋匠工
價之貴輪機件數之繁備製造甚多稟算尙爲合計若製器無幾
逐物以求分晰工料之多寡則造成一器其價有逾數倍者矣凡
造鎗礮輪船等項無事不然開廠創始係由法人日意格德克碑
定議立約該二人素非製造輪船機器之匠初不過約略估計迨
開辦後逐漸增多勢非得已其造未及半而用數已過原估或造

更加多而用費轉就減省似屬西人製器事理之常實未便以工部則例尋常製法一律繩之惟廠工既已備以後不過工料新費數大端應如何設法節省之處請

敕下福建督撫臣會同船政大臣沈葆楨隨時督飭樽節妥辦省其所當省而非省其所必不可省斯於事有濟矣又奉

旨詢及輪船如何製造方可以禦外侮一節臣查兵法須知己知彼乃得制勝之要訪聞英國兵船三百六十餘隻在諸國爲最多內有鐵甲船四十餘隻法國尤有兵船三百餘隻現減至二百四十隻內鐵甲船六十餘隻美國兵船二百餘隻內鐵甲船五十餘隻俄國兵船三百餘隻內鐵甲船二十餘隻布國兵船僅百餘隻內鐵甲船六隻現又續籌添造此皆西洋數大強國勢力相埒其餘小弱諸邦或兵船數十隻百隻不等然而上年布法之戰法兵

敗於陸路雖戰船多而堅且數倍於前向無把握兵事勝敗同難
言已大概西洋商船只可運載兵糧輜重其兵船則分數等小者
曰根較船面置礮數尊用以哨探巡防今閩廠所製萬年清伏波
安瀾等船滬廠所造恬吉操江測海等船大小尺寸雖稍異總之
不離乎根較式樣至外洋兵船大者馬力或七八百匹食水至二
三十丈置礮兩層至四五十尊閩廠尚未試造現滬局造成第五
號船身長三十丈機器馬力四百匹鍋鑪均在船腹水綫之下艙
面及兩旁兩層置礮二十六尊確係仿照外國三枝桅兵船做法
英館新聞紙稱係中國第一號大船信不虛也然食水已十九尺
內江淺洞時便虞阻攔又據滬局道員馮燧光稟稱上年法國有
鐵甲船至滬該員登舟察看船礮堅利異常本年四月英國鐵甲
船又至滬俱泊吳淞江外不能進口該道等往觀水綫之上鐵甲

厚十寸內觀木板厚十八寸船幫均係夾層中可藏人卽轟破外層而裏鐵未穿外水不能灌人機器鍋鑪及兩層巨礮均在厚鐵甲之中其首尾鐵皮稍薄水纜之下鐵皮不過五六分船內礮位用電氣纜燃放各礮一時同響又用氣機輪轉起旋較人力尤爲神速等語此等制作實堪奇詫蓋根較不若大兵船之堅猛兵船又不若鐵甲船之堅猛以鐵甲船禦兵船當之輒糜沉根較乎惟船愈堅大則費愈多今欲我數年創始之船遠敵彼百數十年精益求精之船不待智者而知其不逮然就已成者而益求精未必其終不逮也中國大勢陸多於水練陸軍視練水軍尤亟即使兵船造精非專恃輪船可以禦侮況如大津海口最淺次則江南之吳淞口福州廣東進口均有淺處外洋大兵船鐵甲船勢難深入卽長江金陵以上亦不能駛我之造船不無馳騁域外之意不過

以守疆土保和局而已海外之險有兵船巡防而我與彼可其分之長江及各海口之利有輪船轉運而我與彼亦其分之或不讓洋人獨擅其利與險而浸至反客為主臣嘗督同滬局委員籌議仿造兵船以該局現造五號爲度不宜更求加大庶無事時揚威海上有警時仍可收進海口以守爲戰該局員匠近由英國覓得小鐵甲船式樣身短中寬底平僅置巨礮數尊其圓活礮臺在船中段食水淺而不能出洋聞西國用以守口最宜曾國藩上年曾經奏明仿造尙未開工第爲禦侮之計則不妨多爲之備彼見我戰守之具旣多外侮自可不作此不戰而屈人之上計卽一旦齟齬彼亦陰懷疑懼而不敢遽爾發難若慮制勝無甚把握而遂自聚成謀平日必爲外人所輕臨事只有拱手聽命豈強國固本之道哉惟是

國家經費支絀製造輪船既未可裁撤必須妥籌善後經久之方
竊查閩廠用費專指閩海關洋稅每月五萬滙廠用費專指江海
關二成洋稅均係撥定專款應請仍就原款節縮經營暫無庸另
請添撥惟閩廠洋匠過多需費較重若有不足再由船政大臣等
隨時奏辦至於養船之費當分兵船商船二端閩廠兵船現議酌
撥沿海各省巡防分養嗣後添造兵船無可分撥擬請裁撤各省
內外洋紅單拖網艇船而配以自造兵輪船即以艇船修造養兵
之費抵給輪船月費應請

旨飭部凡有議修各項艇船者概予奏駁令其改領官廠兵輪船
以裨實濟緣紅單拖網等船實不如輪船之迅利雖費倍而功用
亦倍之也沿海沿江各省尤不准另行購雇西洋輪船若有所需
令其自向閩滙兩廠商撥訂製庶政令一而度支可節矣至載貨

輪船與兵船規制迥異閩滬現造之船裝載無多商船皆不合用
曾國藩前飭滬廠再造兵船四隻外另造商船四五隻閩廠似亦
可開造商船以資華商領雇總理衙門去冬已面商及之臣前與
曾國藩籌議中國殷商每不願與官交涉且各口岸輪船生意已
被洋商佔盡華商領官船片樹一幟洋人勢必挾重費以傾奪則
須華商自立公司自建行棧自籌保險本鉅用繁初辦恐無利可
圖若行之既久添造與租領稍多乃有利益然非有熟悉商情公
廉明幹爲眾商所深信之員爲之領袖擔當則商人必多顧慮自
有此議聞華商願領者必准其兼運酒糧方有專門生意不至爲
洋商排擠惟運酒事體繁重現又無船可雇自應從緩酌議將來
各廠商船造有成效再請

敕下總理衙門商飭各省妥爲籌辦抑臣更有進者船廠機器之

用非鐵不成非煤不濟英國所以雄強於西土者惟藉此二端耳
閩滬各廠日需外洋煤鐵極夥中土所產多不合用即洋船來各
口者亦須通用洋煤設有閉關絕市之時不但各鐵廠廢工坐困
即已成輪船無煤則寸步不行可憂孰甚南省如湖南江西鎮江
臺灣等處率多產煤特無抽水機器僅能挖取上層次等之煤至
下層佳煤爲水浸漚無從汲淨不能施工誠使遴派妥員招覓商
人購買機器開采價值必視洋煤輕減通商各口皆可就近廣爲
運售而洋煤不阻自絕船廠亦應用不窮至楚粵鐵商咸豐年前
銷售甚旺近則外洋鐵價較賤中土鐵價較昂又脆硬不適於用
以致內地鐵商十散其九西洋煉鐵煉鋼及碾捲鐵板鐵條等項
無一不用機器開辦之始置買器具用本雖多而煉工極省煉法
極精大小方圓色色俱備以造船械軍器土鐵貴而費工洋鐵賤

而得用無怪洋鐵銷售日盛土鐵營運漸稀也近來西人屢以內地煤鐵爲請謂中土自有之利而不能自取深爲歎惜聞日本現用西法開煤鐵之礦以興大利亦因與船器相爲表裏曾國藩初回江南有試采煤窯之議而未果行誠能設法勸導官督商辦但借用洋器洋法而不准洋人代辦此等日用必需之物采煉得法銷路必暢利源自開權其餘利且可養船練兵於富國強兵之計殊有關係此因製造船械而推廣及之其利又不僅在船械也要之法待人而後行事因時爲變通若徒墨守舊章拘牽浮議則爲之而必不成成之而必不久坐讓洋人事利於中土後患將何所底止耶所有遵

旨悉心酌議緣由謹繕摺由驛密陳伏乞
皇太后

皇上聖鑒訓示謹
奏

滬津機局調員片

同治十一年五月十五日

再滬津機器各局仿製輪船鎗礮軍火事體繁重理大物博非有
精心果力志趣深遠者實難相與有成滬局現有江蘇補用道馮
煥光選用知府鄭藻如津局現有候補道沈保靖籌辦一切苦心
經營數載於茲駕馭中外員匠操縱咸宜綜覈工料鉅款絲毫不
苟監製船械日起有功惟鄭藻如因親老久未省視眷聞乞假歸
粵尙未知何時回局其人才大心細洞悉機要有裨軍國擬請
敕下廣東督撫臣飭催迅速回滬沈保靖近因廠基被水積受潮
淫屢請病假亦須遴員替代以資練習上年丁日昌丁憂回粵臣
因其平日講求洋務機器屬爲留意真才昨據函稱有前署廣東
惠潮道候補道吳贊誠清正有爲不憚煩苦又精於算學堪備督
理製造之選查臣於同治六年二月間帶兵剿捻曾奏調吳贊誠

赴營差委亦深知其結實可靠可否仰懇

敕下該督撫檄令該道雇搭輪船航海來津隨辦洋務製造事宜

俾收指臂之助理合附片陳請伏乞

聖鑒訓示謹

奏

張家口捐修石壩捐

同治十一年五月二十二日

奏爲張家口石壩工程三次捐修完竣懇

恩併案獎敘以昭激勸恭摺仰祈

聖鑒事竊照直隸萬全縣屬張家口大境門外向有護城石壩一道長四百一十七丈有奇以禦口外東西正三溝之水不特保衛外藩進

貢要道兼能蔽護口內旗民田廬洵爲一方保障每逢坍塌皆蒙發

帑興修迨軍興以來庫款支絀咸豐六年被水衝塌後始議民捐民辦曾經前督臣桂良奏奉

諭旨飭部議准捐資各生按照直隸米捐章程給予獎敘並准免其造冊報銷在案嗣於同治六年七月口外大雨傾盆東西正三

溝之水同時漲發致第一段大壩坦坡埋頭海漫等工並第四六七八段坦坡下截相連埋頭均被衝塌數十丈據前任萬全縣知縣李國風會同委員勘明估報因籌款爲難稟經前督臣官文批飭仿照咸豐六年捐修成案仍由地方紳董勸捐辦理同治七年閏四月十八日開工至六月二十六日工竣共計實用工料制錢九千八百二十四千一百七十五文內除提用歲修生息制錢二千八百六十七千三百九十五文外計各商民捐錢六千九百五十六千七百八十文未及請獎同治九年六月連日陰雨以致尾段近城石壩被水衝坍大壩坦坡埋頭海漫壩頂石帽壩後灰土素土長四十五丈餘又繞至壩南埋頭長十四丈餘又口內第二圈營房虎皮石壩被衝十丈餘又聚古營虎皮石壩被衝十丈餘均片石無存時值大汛不克修築隨飭紳董雇夫備料擇要攔護

迨秋汛後經口北道親往督同查勘估計工料爲數甚鉅無款籌撥祇得借資民力設法勸諭捐修該前縣李國風會同敘佐邀集紳董王兆基等設局勸捐共捐制錢二萬二千五百七十二千零並提用歲修生息制錢二千四百三十二千文於十年二月十一日開工至三月二十七日一律修竣前據造冊請獎因冊造未符由司駿飭更造尙未詳送復於同治十年八月霪雨連縣戶段舊壩又被衝坍三段卽經該署縣李葆貞會率敘佐邀集紳董王兆基等撙節勘估其需工料制錢三千六百六十八千二百二十六文先由該縣倡捐銀二百兩並提十年歲修生息制錢七百六十八千文發交該紳董擇於是年八月二十二日開工不敷工料由該紳董捐錢二千五百千文九月初七日修竣尙短工料制錢二千千二百二十六文已由該縣照數捐補以上三次捐修壩工均

由司隨時飭府委員親往查驗委係工堅料實並無草率偷減茲據該縣併案造具請獎清冊開具用過工料細數清摺呈由藩司核明詳請

奏咨前來臣查萬全縣屬張家口護城石壩三次被水衝決工程浩大均經勸捐修理完整該官紳等踴躍輸將洵屬好義急公應請准其照案獎敘以示鼓勵其擬請外獎者由臣酌給功牌獎札謹將捐資較多及尤爲出力各官紳分繕清單恭呈

御覽合無仰懇

聖恩俯准敕部查照咸豐六年奏獎成案分別按名核獎並請頒發執照轉給祇領至運同銜前任萬全縣知縣李國風前署萬全縣知縣候補直隸州知州李葆貞督辦壩工倡勸兼施未便沒其微勞李國風可否俟服闋後以直隸州知州升用李葆貞

賞加運同銜之處出自

逾格恩施除將冊摺送部外理合恭摺具

奏伏乞

皇太后

皇上聖鑒訓示再此項工程係紳民捐辦現已照案開摺送部請

免造冊報銷合併陳明謹

奏

蘇省軍需卹費請核銷摺

同治十一年五月二十二日

奏爲蘇省軍需報銷案內發過卹賞銀兩奉部刪查各款比較成例節省尙多請仍照章核銷恭摺奏祈

聖鑒事竊辦髮捻各逆動用軍需款項疊經前兩江督臣曾國藩會同臣分案奏報請銷在案嗣准兵部以蘇滬軍需一案及剿捻第一第二兩案內請銷卹賞銀兩均有浮銷照例奏駁計共銀七千七百九十二兩五錢查楚軍刊本章程內載卹賞之制凡陣亡者給銀三十兩受頭等傷賞銀十五兩二等賞銀十兩三等賞銀五兩受傷成廢另加等語臣在蘇撫任內附奏蘇滬軍需用款酌量變通片內業將楚軍章程卹賞銀兩與例未符之處聲明奏咨有案是以歷次所發湘淮水陸各軍卹賞一款均照楚軍刊章核實支給並無絲毫浮圖比較例定卹賞陣亡五十兩頭等傷三

十兩二等傷二十五兩三等傷二十兩銀數節省尙多其打仗傷亡偵探遇賊運解糧餉軍火中途被害礮炸溺水巡洋捕盜斃命各項弁勇死事情節雖與陣亡稍異然爲

國捐軀則同故一律照陣亡傷亡每名給銀三十兩至因傷成廢者終身擯棄情殊可憫照章加給卹銀三十兩原屬恤死勸生之義所有奉部刪查各款應請仍照支發銀數核銷以清款目茲據報銷局司道詳請核

奏前來相應繕具清單恭呈

御覽仰懇

天恩敕部查照核銷除分咨戶部兵部外謹繕摺具陳伏乞

皇太后

皇上聖鑒訓示謹

癸

辨駁日使改約摺

同治十一年五月二十八日

奏爲日本使臣定期回國謹將先後辨駁情形恭摺陳仰祈
聖鑒事竊查日本續派使臣柳原前光等來津瀆求改約經臣於
四月初二日將該使臣到津日期奏蒙

聖鑒在案旋據該使呈遞照會約期謁晤臣因該使此來意在改
約誓不准令進見且柳原前光係上年議約隨員不應遞照會
違稱本大臣字樣即將原照會發交海關道面爲擲還該使往晤
津海關道陳欽及臣添派之江蘇記名海關道孫士達經該道等
逐加駁詰徘徊數日復令其同行之葉重寬來署必求示期進見
臣始准於四月初九日已刻來見屆期柳原前光等到署呈出該
國外務卿副島等通候照會一件經臣拆閱內有擬議改換正約
事宜便令參述解說等語詰以約已議定何可遽改柳原係原議

之人何須解說該使復將外務省所給文稿面呈又呈出該外務卿月遞上處照會一件經臣面加指駁謂兩國條約甫經全權大臣議定伊達宗城若不能作主上年卽不應定議旣經定議斷不能遽然改悔且原約章程內一再聲明彼此信守用昭憑信一體信守無渝等字樣交鄰所重者信耳失信爲萬國公法所最忌該國不應蹈此不韙貽笑西人此件照會若據理直覆轉恐有傷睦誼應仍帶回該使囁嚅縮伏疊稱所言極是正理自知惶愧惟回國不能銷差乞將照會暫存臣堅不允行該使復稱容再向陳孫二道商議並將原呈外務卿第二次照會帶去一月以來臣疊次緘商總理衙門妥籌酌辦並飭陳欽孫士達將該外務省照會逐與駁詰該使理屈詞窮但求略予轉圜俾得及早回國該道等察其詞意尙屬恭順誠懇往返數次始允預爲商量然總以必須換

約後始可議辦爲一定之歸宿查該國所議各件如第一條彼國與西國修約恐通商章程有所更易第二條華民在彼訟獄繁興新派理事官須熟察情形未及照約訊斷此皆須屆時相機商辦未便預議者也第四條佩刀係該國禮制不便公禁由該理事官自行禁諭商民無犯第五條日本進出口稅照該國海關成規收稅此則無關輕重應於換約後核准照辦者也惟第三條請將兩國遇事調處議卽裁撤一節西人擲掄在此該國注意亦在此上年臣督同江蘇臬司應寶時津海關道陳欽議創約稿時竇慮日本距我太近凡西國來華通商多取道金山太平洋及日本之橫濱而至上海該國尤爲中國門戶將來設有事變該國雖未必遽爲我用而何此約章牽制不至增一勁敵且不失兵家用閒之意茲該國亟請裁撤誠恐失歡於西人其情可知惟來文旣云有權

可行是係諸國通例則亦何須裁撤此條自應無庸置議該使始
猶聲言兩請本國示遵陳欽等再三開導謂舍此更無別法該使
始求轉詳奉批後照給回文銷差據該道等將所議各節妥核具
詳經臣逐條明晰批示飭令移知該使又由臣繕具照覆該國外
務省公文一件交其齎回並飭陳欽等告知該使以議定之約復
欲改議爲各國向來所無之事論理本不應接待因念柳原疊次
遠來尙無違悖強迫之語姑與晤商嗣後該國如遣使來華換約
自應以禮接待若仍瀆求改約則是顯違各國公例應卽不與接
待矣該使接領回文遂於五月二十六日來署謁謝並稱六月初
遇有輪船南駛卽行搭坐歸國復經臣再三叮囑謂兩國換約後
如有可以通融之事原可隨時酌核商辦其萬難允行者斷不能
稍有更易該使唯唯而去察其情詞頗似知感悟稟稱須俟該國

右大臣岩倉往西洋各國議改條約事竣方可派員來華互換原約等語謹將該國外務省兩次照會並處照覆該外務卿文稿暨陳欽等會詳及臣批答文件照繕清單恭呈

御覽除咨總理衙門外所有日本使臣定期回國及先後辨駁情形理合恭摺由驛馳陳伏乞

皇太后

皇上聖鑒訓示謹

奏

謹將日本國外務卿副島等兩次照會暨臣處照覆該外務省文稿照繕清單恭呈

御覽

同治十一年四月初九日柳原前光面交日本外務省照會
日本外務卿副島外務大輔寺島爲申謝並照會事曩者大藏卿
伊達使於貴國幸值貴爵閣大臣暨應泉臺陳道臺早奉

欽派接議條約事宜況蒙盛誼厚待實所罕遇遂獲永結兩國之
好旋國反命殊愜朝廷嘉悅本卿大臣等知之均深欣感之至肅
此申謝茲奉上諭和清兩國經已修好通商合亟揀派妥員遣於
清國口岸監視兩國交際通商事宜欽此本卿大臣等隨即銓選
外務大丞柳原特請欽命兼任少辦務使外務少記鄭永衛作爲
幫辦同遣於貴國辦事嗣後遇有本卿大臣等與貴大臣爲因擬

議改換正約事宜往來文件便令解通文內情節時加參述解說以期往來兩得妥協又外務大錄品川忠道任代領事在滬管理本國人民通商事務所有屬員從之爲此備文照會貴大臣希即查照存認該官員等使其遵約供職可也須至照會者

日本外務卿副島等第二次照會

此文已而發還陳欽等鈔稿錄呈

爲照會事明治四年九月十九日我欽使伊達歸來即將與貴大臣議定之修好條規及通商章程等奏呈復命事畢既而本卿大臣等奉上諭前者兩國全權大臣議立修好通商之約查其條款可以各自照行惟以來歲我與歐西諸國改修條約之期將至已將今後意欲改議事件大略擬定在案將此次兩國條約細爲核對若有應行酌改之處即須舉其綱領照會清國大臣預爲擬題略准以便批准遣使互換本約欽此本卿大臣等欽遵諭旨當

將此約就該提案中理逐款查覈題其綱目如左

一修好通商各條款內因嗣後改定西例應行修改事件

從前我國與各國開彼商民則有來我商民則無往而今特發欽使徧歷歐西欲取法於諸國互相常行條例以定我國外交約款而待彼諸國來人耳故昨與清所定條約至他日我與歐西改定其約之後則如國法訊斷等事必有須行更正者是以應議俟後改正

一修好條規第二條調處之約

兩國既結和誼若遇事從中調處盡其友情雖無此條有權可行是係諸國通例故此一條須議裁撤

一修好條規第十一條刀械之禁

刀械之於我國人也有准無禁惟清國所禁耳此遵修好條規第

八條由我理事官檢束之可毋庸立約明禁也故此禁約須議削
除右列以上綱目已經奏准為此本卿大臣等備文照會貴大臣並
敝國派委外務大丞兼少辦務使柳原外務少記鄭據情詳申希
乞隨卽查照其所陳述煩爲裁復俾本卿大臣等能與貴大臣處
時得以備文往來預請擬題略准以爲批准互換之地幸莫加焉
禱切須至照會者

照覆日本外務卿副島等公文

同治十一年五月二十三日

爲照覆事同治十一年四月初九日外務大丞柳原面呈貴卿大
臣照會內開覽者大藏卿伊達使於貴國幸值貴爵閣大臣齊應
皇臺陳道臺奉

欽派接議條約事宜記蒙盛誼厚待實所罕遇遂獲永結兩國之

好旋國反命殊慙朝廷嘉悅本卿大臣等知之均深欣感之至肅
此申謝茲奉上諭和清兩國經已修好通商合亟揀派委員遣於
清國口岸監視兩國交際通商事宜欽此本卿大臣等隨卽銓選
外務大丞柳原前光特請欽命兼任少辦務使外務少記鄭永甯
作爲幫辦同遣於貴國辦事嗣後遇有本卿大臣等與貴大臣爲
因擬議改換正約事宜往來文件便令解通文內情節時加參述
解說以期往來兩得妥協又外務大錄品川忠道任代領事在滬
管理本國人民通商事務所有屬員從之爲此備文照會貴大臣
希卽查照存認該官員等使其遵約供職等因查本閣爵大臣上
年欽奉

諭旨會議和約因貴國伊大臣奉有全權明文是以彼此相信議
成條約當於畫押蓋印互交後卽已

奏明定案兩國初次訂約最要守信斷不能旋允旋改來文既稱
伊大臣旋國反命殊愜朝廷嘉悅貴卿大臣知之均深欣感之至
等語是貴國應毫無異議向來中國與各國交際通例一經全權
大臣公同議約只有再行各派大臣換約並無定議之後未換之
先另派大臣議改之事貴卿大臣此次銓選柳原前來據稱爲因
擬議改換正約事宜業經議定忽又遣員議改顯與上年全權大
臣公同擬議者自相矛盾本閣尙大臣實未敢奉教也所有未盡
之言已飭原派幫辦議約之津海關陳道臺等轉告柳原回國述
知毋庸贅陳至品川忠道在滬管理貴國人民應俟兩國互換和
約事畢再行查照約章開辦爲此備文照覆貴卿大臣希卽查照
可也再柳原面懇轉寄貴卿大臣照會總理各國事務衙門王
臣公文一件並伊大臣申謝照會一件已代轉遞昨准來函均令

由本閣傳大臣轉授知照合併聲明須至照會者

謹將津海關道陳欽記名江蘇海關道孫士達會詳日本國
來照會商改條約逐條核議詳文暨臣處批答照繕清單恭
呈

御覽

爲詳請示遵事同治十一年五月十三日准日本國第四等官柳
原照會內開於昨明治四年七月二十九日我欽差大臣伊達在
貴國會同

欽差大臣李鴻章所訂條約經該伊達奉回本國繳呈朝廷深爲
嘉悅會時欽派右大臣岩倉等專往歐西諸國踐期改約因其往
復自需年餘延議以伊大臣所訂日本一邊條款及有礙別國局
面之事須照新定西約改議望其劃一上諭外務卿大臣等即將
此山備文照會清國大臣預前聲明俟岩倉等回國當卽派使換

約外務卿大臣等遵旨擬議奏明隨即具情函達李爵閣大臣又請欽命派本大丞兼任少辦務使帶同外務少記鄭等齎呈文函委本大丞便將文內細情面爲詳述今已抵津合應具由黏該文件及委限等鈔底先行通報爲此照會貴海關道祈卽代詳李爵閣大臣煩爲查准賜覆須至照會者計黏外務卿大輔照會及本大丞奉委文稿兩件等因職道欽會同職道士達竊查日本國去年秋甫經立約尙未互換此時遽請改議殊非信守無論何國皆無此例詳閱柳原鈔送彼國外務省照會及奉委要旨各件有尙可通融者有斷難允從者謹就管見逐條核議如第一條所言來歲與歐西改約之案起於欽使適清之後業已擬定專欲取法於歐西常行條例以改我國外交之約一節詢之柳原等據稱日本國遣使赴歐西各國修約恐通商章程有所更易特來預商職道等

查兩國修好原不僅重通商口後更易章程彼此皆可變通是以
去歲議約時並不以口岸多寡計較也惟現在日本與西國修約
尙無成議勢難懸定原不必先期預商應俟換約後章程如有更
易自可隨時商辦又如第二條所言各港所住清民不下數千新
派理事官來須先熟察實地情形尙有隨時酌議之處未及能照
條約訊斷一節又詢柳原等據稱日本國通商各口相距均遠清
民人數又多若新派理事官一員難以兼顧未能各口會同訊斷
且現與西國換約恐有更改期於一律辦理職道等語以西國商
民是否仍由西國領事自行審辦柳原等復稱現在如此辦理以
後西約如何更改尙不可知職道等查各管各民係各國通例今
彼國欲改西約諒亦未能定議我兩國既經定約自當永遠遵守
惟聞橫濱長崎神戶三處華民最多向由日本官代爲管理中國

新派理事官前往情形或未深悉自應留心察訪借鈔卷宗並一切詳詢彼地方官以期妥善應俟中國派員時再行辦理又如第三條所言調處一條據查美國與清國所約之文美國止云自爲清國從中調處卽我國與美所約亦同皆屬偏爲美國單作一面之詞欲議裁撤一節又詢柳原等據稱現向美國換約擬將此條刪除詰以將來果能刪除否答云尙未能定職道等查兩國旣結和誼遇事調處自是約中應有要義卽美國無此亦當增添況美國偏爲一面我則平列兩國尤屬周備去秋議約之初曾經應某司與職道欽專兩聲明並屢次與日本使臣面談凡立條約是自主之國皆有自主之權不必瞻徇他國伊大臣深識大體亦以爲然故仍行列入也若惟於浮言忽欲裁撤西國環視當更相輕因人改約將誰歸且與來文所稱雖無此條有權可行是係諸國

通例等語亦覺矛盾今請裁撤此條不但啟人猜疑將所謂修好
者何事耶此條應無庸議又如第四條所言刀械一禁論我國官
吏紳商常佩雙刀即農工商賈有時亦帶單刀本係禮制不便公
禁由我理事官知其有禁令我商民無犯故議刪除一節職道等
查帶刀既係彼國禮制雖爲中國所禁如果由彼理事官自行諭
禁商民無犯似尙無甚妨礙既經立約修好須求兩全不必強以
所難顯爲公禁應俟換約後彼此照會核准立案仍候修約屆期
再行酌改又如第五條通商章程第二十八款所載進出口稅一
例須議在我國各港則應照該海關成規收稅一節職道等查柳
原等面交彼國海關通商章程其進口貨物未載進口稅則者雖
或載有出口稅則不得援此納稅必須按價抽稅其出口貨物未
載出口稅則者亦照上例等語核與原定第二十八款通商章程

在通商各口如彼此海關嗣後有變通之處由理事官詳請駐京大臣隨時照會商辦等語今柳原等所請似亦無甚妨礙尚可稍為變通惟必俟換約後方能照約商辦所有職道等逐條核議緣由是否自當理合詳請憲台查核示遵實為公便

同治十一年五月十八日詳

批據詳日本國外務大丞柳原照會關道商改條規各件並該道等逐條核議緣由均已閱悉本大臣上年奉

旨會議日本國約事因伊大臣老成諳練本有日本全權明文是以彼此相信議成此約今未換之先遽請商改查兩國初次訂交最要守信若旋允旋改先自失信無此辦法即從前各國議約經彼此畫押蓋印定案後並無准改之例本應無庸置議姑念柳原等前兩次來津曲遠誠款贊成和誼頗為勤勞特令該道等與之

會商茲閱來詳如第一條彼國與西國換約恐通商章程有所更
易特來預商一節本大臣查日本遣使往議西約此時尙無成說
何必懸擬預商未免多此一舉應如該道等所議俟換約後如有
必須更易之處隨時察酌商辦第二條華民在彼訟獄繁興新派
理事官須熟悉情形酌議未及能照條約訊斷一節本大臣查中
國因未換約現未選派理事官將來派員前往自應照約辦理惟
理事官初到彼國情形生疏亦或不免應如該道等所議中國派
理事官時令其留心察訪借鈔卷宗務向地方官諮詢一切屆時
再行飭遵第三條請將兩國遇事調處議卽裁撤一節本大臣查
兩國既結和好遇事調處誠如來文所云雖無此條亦有權可行
惟去歲議約時不載則可既載復裁殊違信義旣云是係諸國通
例本無窒礙何須裁撤且兩國相距較近永以爲好尤非西洋遠

邦可比若欲裁去所謂修好者在應如該道等所議此條無庸
置議第四條佩刀係彼國禮制不便公禁一節本大臣查佩刀既
係彼國禮制中國既與通好自未便明爲禁阻應如該道等所議
由日本國理事官自行禁諭商民無犯俟換約後彼此照會核准
通行仍候修約屆期酌改第五條日本進出口稅一例照該海關
成規收稅一節本大臣查日本國海關通商章程既有不同亦可
稍爲通融應如該道等所議俟換約後照約商辦總之條規既定
各應信守將來兩國和好日敦其無關礙者自可日後會商其有
關礙者無論何時斷難允從也仰關道照提柳原知照仍候分別
奏咨備案繳文稿存

五月
批

張家口糧臺報銷摺

同治十一年六月初八日

奏為張家口糧臺用過銀兩截至同治十年十二月底止先行造冊報銷恭摺仰祈

聖鑒事竊據口北道奎斌詳稱張家口設立糧臺采運調赴烏城庫倫各起官兵米糧於同治九年十二月初十日開辦業將應需米麵並牛毛油布單布雙綫各袋荆筐蔴繩等項時價以及房屋賃價斗級倉夫更夫米折工食各營官兵名數詳蒙節次奏咨立案其委員銜名薪水已由該道徑行報部至宣化古北兩軍米麵價銀係由直隸練餉局於該兵夫月餉內扣撥惟運腳口袋等項歸糧臺報銷亦奏明在案今截至十年十二月底止用過粟米價銀一萬九千五百兩一錢四分六釐白麵價銀二千七百九十二兩八錢二分牛毛袋油布袋單布袋雙綫袋價銀一萬二千七百

九十六兩五錢三分荆簍麻細價銀五千八十五兩四錢五分駝
運腳價按例支銀二千四百七兩五錢七分七釐委員薪水各役
工食銀二千一百九十八兩五錢八分六釐房價銀六百三十四
兩九錢八分六釐統其支銷銀四萬五千四百十六兩九分五釐
兩次奏撥部餉銀六萬兩除開銷外實存銀一萬四千五百八十
三兩九錢五釐又餘平項下除委員薪水各役工食不扣外其餘
各款每百兩扣銀一兩共扣餘平銀四百三十二兩一錢七分五
釐內已按例支銷書吏飯食心紅紙張銀三百五十五兩五錢九
分九釐實存銀七十六兩五錢七分六釐同實存正款及十一年
三月開領到部餉銀三萬兩統歸下次報銷等情造冊請奏前來
臣復核各款細數均與奏咨時價及例銷銀數相符現在各營未
能凱撤自應按年截數造報以清款目除冊送部外理合恭摺具

陳伏乞

皇太后

皇上聖鑒敕下戶部核銷再此案並無應歸兵工兩部核銷之件

合併陳明謹

奏

修治府河工程摺

同治十一年六月二十日

奏為修治府河興復水利用過工料銀數開具清單恭摺奏祈
聖鑒事竊臣前將修治府河興復水利用過工程銀兩造冊咨部
核銷奏明在案嗣准工部咨令將此案做過工程丈尺照例繕單
奏報核辦等因即經札飭司道遵辦去後茲據遵照部咨開單繪
圖山清河道會同藩臬兩司具詳前來臣覆核無異除照例
題銷並將河圖咨送工部外理合開具工段丈尺銀數清單
奏報伏乞

皇太后

皇上聖鑒謹

奏

謹將挑濬府河上下游河身泉源並添建閘座各項工程丈尺暨用過土方工料運腳銀兩繕具清單恭呈

御覽

計開

一挑濬保定省城西關靈雨寺起至滿城縣一畝諸泉止工長七千九百一十四丈八尺二寸口寬四丈至五丈五尺不等底寬一丈七尺至三丈八尺不等挖深五尺三寸至六尺五寸不等計六十八段除原河空土外其實出土九萬四千七百九十八方八寸每方工價銀七分暨六分五釐共合銀六千四百九兩七錢三分四釐

一挑濬保定省城西關廣福橋起至大汲店西小莊止工長三千三百二十三丈二尺口寬三丈七尺至四丈不等底寬一丈八尺

至二丈二尺不等挖深五尺四寸至五尺七寸不等計二十九段
除原河空土外其實出土四萬一千四百六方二尺五寸每方工
價銀六分五釐共合銀二千六百九十一兩四錢五釐

一聞段挑挖保定省城南關天水橋起至雄縣三岔河口止其計
湊長三千五百六十一丈口寬五丈一尺至六丈八尺不等底寬
二丈九尺至四丈八尺不等挖深六尺至七尺三寸不等計三十
四段除原河空土外其實出土八萬六千六百二十七方五寸每
方工價銀七分共合銀六千六百三十八兩八錢九分二釐

以上三項共計一百三十一段工長一萬四千七百九十九
丈二寸實出土二十二萬二千八百三十一方三尺八寸其
用銀一萬五千一百六十五兩三分一釐均係比照清河永
定兩道土方例價辦理

一上游齊村石閘一座高八尺金牆雁翅其長六丈四尺統計用過各項工料暨運腳銀八百五十九兩八分四釐三毫

一上游蠻子營石閘一座高八尺金牆雁翅其長六丈統計用過各項工料暨運腳銀八百五十八兩六錢八分七釐九毫

一上游張海莊石閘一座高七尺八寸金牆雁翅其長六丈統計用過各項工料暨運腳銀八百一十八兩二錢七分五釐七毫

一下游蓮花橋石閘一座高一丈一尺金牆雁翅其長十六丈統計用過各項工料暨運腳銀二千二百六十七兩二錢二分六釐五毫二絲

一下游新橋石閘一座高一丈一尺金牆雁翅其長十六丈八尺統計用過各項工料暨運腳銀二千三百九十三兩六錢三分六釐九毫六絲

一下游善馬廟石閘一座高一丈二尺金牆雁翅共長十五丈八尺統計用過各項工料暨運腳銀二千二百四十七兩九錢五分七釐九毫七絲

一下游清河石閘一座高一丈二尺金牆雁翅共長十六丈二尺統計用過各項工料暨運腳銀二千三百六十兩二錢九分七毫一絲

以上七閘共用過各項工料暨運腳銀一萬一千八百五兩一錢六分六絲係比照清河永定兩道例價辦理統計上下游濬泉挑河建閘其實用過土方工料暨運腳等項銀二萬六千九百七十兩一錢九分一釐六絲

籌解新疆餉銀摺

同治十一年六月二十七日

奏爲籌解新疆餉銀及飭辦軍米恭摺陳仰祈

聖鑒事同治十一年六月初二日欽奉初一日

寄諭景廉現擬采買駝隻及籌撥軍裝等項需款甚急著於各該省欠解新疆軍餉及協餉內無論如何爲難先行籌撥銀六七萬兩迅速解至察哈爾收存該都統所部需用糧石請由口北歸綏兩道每月各運解京斗粟米四百石著李鴻章定安督飭該道等照數籌辦等因欽此遵卽恭錄咨行趕緊籌辦撥解去後茲據藩司孫觀詳稱直省應協新疆月餉前經議定按四箇月委解一次已將同治六年十一月起至七年六月止欠餉銀二萬兩又十年八月起至十一年三月止協餉銀二萬兩三次委解交收奏咨在案查直隸原係缺額之區從前年穀順成所入尙不敷所出上年

水災甚廣籌工籌賑支絀彌形幸賴南省捐輸飢民藉以存活迄今被災州縣尙有水未退盡之處春賑之外又須加賑兼之修築隄防疏消積水需用尤鉅實屬力盡筋疲各州縣應徵本年上忙糧租半已停緩司庫進款益少而例發

陵工俸餉各營兵餉以及橋道兵差河工歲拾修暨各屬例支一切正雜銀兩皆關緊要欠發之數日增若再兼籌前項鉅款實屬無從設法惟新疆需餉孔殷不得不於無可設措之中爲抱彼注茲之計茲將應發各款酌量停減先於司庫旗租項下湊撥銀三萬兩卽作七年七月起至八年六月止十二箇月新疆欠餉委候補知縣張瑛解赴察哈爾都統衙門交收其餘欠餉協餉銀兩俟庫項稍充卽行陸續籌解等情請奏咨前來臣覆加確核均係實情應飭趕緊起解至量廉所部需用粟米已飭口北道設法籌辦

應需米價等項即在部撥項下動支除分咨查照外所有解新
賑協餉及飭辦軍米緣由理合恭摺

奏伏乞

皇太后

皇上聖鑒謹

奏

興工代賑摺

同治十一年六月二十七日

奏爲動撥賑款及各省捐項修築直屬河隄城垣橋道以工代賑
先行截數

奏報恭摺仰祈

聖鑒事竊查直隸沿河州縣地勢低窪漫溢時虞上年雨水過多
濱河各屬山廬民舍大半衝沒經臣奏請截漕撥款就地籌捐並
由南省勸集捐項賑撫兼施又各處河隄因帑項支絀歲修額款
停減廢弛殆盡經此次大水處處衝塌必須及時修築冀目前災
民得以趁工而地方可藉免水患疊飭該管道府督同印委切實
勘估次第興辦所需經費均由籌賑局陸續撥發茲據該局司道
詳稱遵查先後由局發過修築永定河上游金門關減水石壩挑
挖引河銀六萬四千七百四十二兩七錢九分二釐又撥永定河

加培兩岸隄埝工程銀二萬八千兩又大小清河南北運河天津
減河現均擇要修築其由局籌撥各款如新城縣青陵村固安縣
李戶莊兩處挑挖淤河堵築清河決口原估工料銀一萬餘兩除
由藩司借領新城縣養廉並勸捐銀款外由局撥發銀二千兩又
保定縣劉家園決口議築月隄護埝估需銀二千二百五十餘兩
除由司借領該縣養廉外支銷春撫銀一千一百二十兩撥用文
安縣春撫制錢一千五百千文並由局加發銀五百兩又安州修
築各河道隄埝支領賑米一千四百三十七石制錢五千八百四
十九千文又安平縣修理瀕龍河南北兩岸決口以工代撫制錢
二千七百八十六千七百文又宣惠河自東光縣范家隄起至滄
州鹽山止閒段淤塞計七十餘里集夫挑挖除春撫餘銀二千五
百兩賑米六千石外又撥發銀二萬兩又東光縣修築香胡同隄

並加築龍尾壩迎水壩及魏家隄等工共支銷賑米二千五百石
制錢七百九十六千文又天津海河爲直境五大河匯歸之所來
源過旺每致泛溢非開濬減河不足以分水勢查滄州捷地減河
自百壩至牧猪港縣長一百餘里節節淤塞議分十九段挖挑並
堵築決口墊修石壩補修各處殘缺共估需銀三萬一千二百六
十餘兩已發銀三萬一千兩又津郡南窪自去秋雨後一片積潦
儼成巨浸引河故道淤塞一律挑挖疏濬並於最窪之鹹水沽白
塘口兩處開通建閘已撥發銀一萬九千兩尙未估定確數又海
河南岸大道低窪之處至今積水尺餘開進口門加修橋閘海河
北岸邢家莊臥河村泥窩三處挑濬引河修整橋梁共估需銀六
千餘兩已發銀三千兩又撥北運河月案修隄銀九千三百七十
兩又統領盛軍提督周盛波修築青節泊一帶南運河隄撥解銀

一萬三千三百一兩二錢一分六釐又南皮縣稟修城工除該縣勸捐銀八千兩外由局發銀六千四百兩又河間縣稟修城南八里橋及恩道工程支領制錢一千七百九十一千二百五十文又津沽棧道自丁字沽起至玉皇廟止係赴京通衢被水衝決應加修築並添造涵洞六處估需工料銀一萬六百三十餘兩發過銀一萬六百十六兩以上撥發各款併計已奉奏明有案之金門閘減水石壩及南運河隄工銀兩在內共由各省賑捐項下撥發銀二十一萬一千五百五十兩八釐制錢一萬二千七百二十二千九百五十文米九千九百三十七石如有續應添撥之項隨時詳請核示茲先將前後撥發銀米制錢各數詳請核奏前來臣查直屬水利久未興修永定及南北運河或關繫運道或保衛民田皆恃隄防以資宣洩無如失修多年隄岸潰決河身淤淺祇有水患

而無水利平時卽欲興辦斷難籌此鉅款今以勸捐助賑之資爲計工代撫之用旣免窮民失所復令要工克成實爲一舉兩得現修各工尙有未報竣者業飭趕緊修濬以禦伏波盛漲其業經報竣者由臣派委委員分往驗收委係工堅料實並無草率偷減工程丈尺亦係查照河工向來做法極爲穩固惟直屬白破水之後沿河居民耕種失時情形困苦此次雇集災民合力修築其中多有老弱貧民傭工趁食卽丁壯民夫半皆疲餓之餘所需工費均係酌量籌給俾資養贍用副以工代賑之本意其動用經費均就各省解到捐項及撥定賑款分別散放核實給領無稍浮冒亦無動用部帑若令按照工部向辦則例將土方工價逐款造銷轉不免有遷就失實之弊應請查照歷屆捐辦工程成案免其造冊報銷仍歸入直隸賑撫案內彙案辦理所有動撥賑款捐項修築河

隄城垣橋道工程以工代賑各緣由理合先行截數據實陳明伏乞

皇太后

皇上聖鑒訓示謹

奏

外省捐賑請獎片

同治十一年六月二十七日

再上年直屬雨水過大被災較重經臣奏請截漕撥款籌辦賑撫並奏明在江浙等省勸捐棉衣銀米解津散放復因粵東商富輻輳向稱繁庶兩廣督臣瑞麟曾任直隸深悉瘠苦情形函請商飭司道酌勸捐助旋准覆稱粵省亦因被水歉收民力拮据商賈頗多折閱無從勸辦惟畿境災民待哺孔殷自應勉籌集腋督同司道府縣捐集銀四萬二千兩內督臣瑞麟倡捐廉銀六千兩粵海道關監督崇禮兼署廣東臬司鹽運使鍾謙鈞各捐銀一萬兩廣東藩司鄧廷枏捐銀二千兩糧道貴珊捐銀一千兩廣州府知府馮端本肇慶府知府瑞昌各捐銀二千兩潮州府知府段錫林捐銀一千兩理事同知長豐署廣州府通判方功惠各捐銀五百兩南海縣知縣杜鳳治代理順德縣知縣施紹文各捐銀一千五百

兩代理番馬縣知縣胡鑑署東莞縣知縣王炳文署連平州知州
田明曜署新會縣知縣徐寶符各捐銀一千兩派委候補鹽大使
諸鈞由海道運解到津飭據籌賑局司道照數兌收在案伏查大
學士兩廣督臣瑞麟等以畿疆被水情殷拯濟捐解鉅款立蘇民
困公忠體國捍患卹鄰實堪敬佩惟瑞麟係現任封疆大員崇禮
已有二品頂戴職分較崇應如何給獎之處臣未敢擅擬相應請
旨核奪按察使銜署廣東臬司鹽運使鍾謙鈞擬懇

恩賞給二品頂戴其廣東藩司鄧廷枏以下雖據聲稱不敢仰邀
獎敘惟以隔省人員捐辦賑款不吝解推無分畛域均堪嘉尚應
請歸入直隸賑撫案內查照臣上年奏定章程分別給獎或准其
移獎子弟統俟賑務告竣月行核明彙辦再委員諸鈞領解要款
經涉重洋不避艱險洵屬著有微勞應請

旨將廣東分缺先前鹽大使諸鈞仍以鹽大使歸分缺先前儘先
補用以示鼓勵合併陳明伏乞
聖鑒訓示謹附片具
奏

密籌調員接統銘軍摺

同治十一年八月初二日

奏爲遵

旨密籌曹克忠所部銘軍撤回安插擬先請

敕調幹練大員來津商定機宜赴陝接統以弭後患恭摺仰祈

聖鑒事竊

臣承准軍機大臣密寄七月二十八日奉

上諭前因武毅右營勇丁潰散並有戕害營官情事當經諭知穆圖善俟左宗棠進駐蘭州卽督率得力兵勇移紮乾那一帶並察看曹克忠能否得力所部勇丁如何分別撤留令該將軍悉心酌度奏明辦理茲據邵亨豫奏稱曹克忠自接統銘軍後駕馭未能得宜時逾半年與兵將總不浹洽該提督久患足疾於營哨各官疏於接見軍心已搖訛言四起附近居民紛紛遷徙營弁亦多乞假請飭李鴻章密籌辦理等語軍營統帥全在謀勇兼施聯絡軍

心申明紀律曹克忠既不能約束勇丁致令戕官潰散是其不勝
統帥之任已可概見近復患病不能接見營哨各官則其兵將離
心猜疑日積勢所必至此軍素稱勁旅現在不但無益陝防且恐
激生事端致滋後患著李鴻章悉心籌畫將曹克忠所部銘字一
軍應如何撤回安插俾有用之兵不致潰散爲患地方是爲至要
穆圖善於行抵乾邠後妥爲布置俾銘軍去留得以迅速酌定不
至日久患生邵亨豫於銘軍未撤之先務當不動聲色妥爲調處
以弭亂萌該署撫原片著鈔給李鴻章穆圖善閱看將此由五百
里各密諭知之等因欽此跪聆之下仰見

聖慮周詳

指示嚴切欽悚莫名臣前因曹克忠爲多隆阿部下得力之將又
在秦隴素有戰聲劉銘傳請假回籍已奉

旨允准並據該提督

奏請曹克忠接統銘營自應體察軍情不致齟齬臣相距太遠若
月請

簡派他人恐轉於軍情未洽不敢豫存成見仍請屬曹克忠到營
後妥爲撫馭勿變舊章勿逞客氣又緘勸劉銘傳從客商辦勿稍
疏率孰意曹克忠行抵西安卽與劉銘傳意見不合及至乾州則
劉銘傳急於交卽曹克忠卽行奏參皆覺未甚妥愜而已無從追
悔此臣慮事之疏知人之闇所夙夜負疚者也各營將士經劉銘
傳一手募練轉戰十年如接統者恩信未孚眾情斷難浹洽臣疊
次馳書曹克忠竭誠勸誡謂其入手時辦理鹵莽恐失軍心以後
當加意聯絡整頓俾爲我用六月間忽接曹克忠函稱該提督足
疾數月未愈武毅石營竟有會匪勾串譁潰戕官情事聞之不勝

集憤當又緘屬該提督務勤於接見將領約束營哨上下不稍隔
閤指臂庶可相聯昨接其七月十六日來書據稱與各統領營官
推心置腹病時常在臥室接見並無不洽之處軍心似已帖服惟
陝省民情浮動誤聞游勇捏造流言或不免附和張皇並以該提
督足瘡加劇人地不宜請選賢能往代等語臣維軍中易將本極
難事察度曹克忠詞意目前尙不至遽形決裂當卽復書慰勉並
允俟徐籌替人再行妥辦以安其心茲復欽奉
諭旨以此軍素稱勁旅現在不但無益陝防且恐激生事端應如
何撤回安插俾有用之兵不至潰散爲患地方

聖謨深遠處置精當臣反覆籌思計無踰於此者但若令曹克忠
撤回無論其病體未愈退志已萌卽勉強遵行亦恐呼應未靈激
生他變臣處又無與銘軍素習可當一面之人惟查有過缺提奏

按察使劉盛藻自同治元年創募銘營卽隨劉銘傳在營帶隊馳驅南北倚之如左右手該員威惠廉正軍士翕服劉銘傳素性跡地臨敵則自將督戰無事或請假離營皆賴劉盛藻頻年坐鎮督率訓練是以克成勁旅所向無前七年捻平後臣奏令劉盛藻代統銘軍萬眾駐防張秋河北兼顧畿南曾國藩莅直兩年指揮如意銘營到處兵民相安劉盛藻之力也嗣劉銘傳復出奉

旨移師赴陝臣力勸劉盛藻偕行以資彌縫匡救之益劉盛藻因親老久役決計引歸劉銘傳亦不忍重拂其意今曹克忠撫馭未宜陝西撫臣邵亨豫河南撫臣錢鼎銘來信皆欲劉盛藻復起視師而該舉司鄉居恬淡自回籍後並無隻字與臣通問臣念銘營素極整肅經此變易習氣頗難挽回撤留皆須妥議必得威望與將士素孚者接統然後撤回安置可漸順手昨已專函剴切諭令

劉盛藻兼程北來妥商辦理以維大局合無仰懇

天恩敕下安徽撫臣英翰飛飭該臬司兼程赴直與臣籌酌機宜再令迅速往陝接統銘軍妥撤回南徐籌安置翼可弭茲隱患將來穆圖善行抵乾州既經帶有得力兵勇可否請

旨飭令該將軍毋庸留訓銘營免滋搖惑除俟劉盛藻到直赴陝有期再行具

奏外所有遵

旨密籌銘軍撤回安插擬調員妥辦各緣由理合繕摺先行由驛據實覆陳伏乞

皇太后

皇上聖鑒訓示施行謹

奏

請 陛見摺 同治十一年八月二十日

奏爲籲懇

陛見候

旨遵行恭摺仰祈

聖鑒事竊臣自同治七年八月勦捻事竣請

覲後旋赴湖廣總督本任九年七月因天津教案遵

旨由陝西軍營帶兵赴直卽蒙

恩調任直隸維時洋務緊要次第籌辦駐津年餘又上年水災過

重撫綏彈壓諸政殷繁未敢遽離瞻懇

闕廷夙夜疚歉本年窪區雖有偏災地方尙臻靜謐又荷

恩准截留南漕接濟冬春民食臣當督飭司道查勘情形酌量撫

恤海防遂漸布置中外交涉事件亦均清理妥協違

天顏於咫尺屬

慶典之恭逢犬馬戀

主之誠益難自己合無仰懇

天恩准臣來京

陛見叩聆

聖訓俾獲遵守曷勝悚息竝幸之至如蒙

俞允臣將津門諸務料理稍畢卽照向章帶印北上地方要政仍

於行次覈辦合併聲明所有微臣籲懇

陛見緣由謹繕摺具陳伏乞

皇太后

皇上聖鑒訓示謹

奏

李文忠公奏稿卷十九